



THEOT Daniel in IES77

Text taken from Accordance Module=Mahibere Hawariyat

Drafts 1-3 were prepared by the Addis Ababa Transcription Team, directed by Daniel Assefa; Draft 4, Ralph Lee

Dan. 1:1 አመ ሠላሳ ዓመተ መንግሥቱ ለኢዮአቂም ንጉሠ ይሁዳ መጽአ ናቡከደነፆር ንጉሠ ባቢሎን

ኢየሩሳሌም ወቀተላ።

Dan. 1:2 ወአግብኦ እግዚአብሔር ውስተ እዴሁ ለኢዮአቂም ንጉሠ ይሁዳ ወንዋየ ቤተ አምላኩ ወንዋየሂ አብኦ ውስተ ቤተ መዝገቡ።

Dan. 1:3 ወይቤሎ ንጉሥ ለአስፋኔስ ሊቀ ሕጽዋኒሁ ከመ ያምጽእ እምደቂቀ እስራኤል እምእለ ተፃወዉ እምዘመደ መንግሥት ወእመላእክት።

Dan. 1:4 ቢጸ ወራዙተ እለ አልቦሙ ነውር ዘላህይ ገጸሙ ወይኄልዩ ጥዩቀ እለ ቦሙ ኅይል ይቁሙ ውስተ ጽርሐ ንጉሥ ቅድሜሁ ወይምህርዎሙ መጽሐፈ ወነገረ ፋርስ።

Dan. 1:5 ወአዘዘ ሎሙ ንጉሥ ሲሳዮሙ ኩሎ አሚረ የሀብዎሙ እማእደ ንጉሥ ዘዘ ዕለቶሙ ወእምነ ወይን ዘይሰቲ ውእቱ ወይሕርሥዎሙ ሠለስተ ዓመተ ወእምዝ ይቁሙ ቅድመ ንጉሥ።

Dan. 1:6 ወሀለዉ ምስሌሆሙ እምደቂቀ ይሁዳ ዳንኤል ወአናንያ ወአዛርያ ወሚሳኤል።

Dan. 1:7 ወወለጠ ሎሙ አስማቲሆሙ ሊቀ ሕጽዋኒሁ ለንጉሥ ወሰመዮ ለዳንኤል ብልጣሶር ወለአናንያ ሲድራቅ ወለአዛርያ ሚሳቅ ወለሚሳኤል አብድናን።

Dan. 1:8 ወአጥብዐ ዳንኤል በልቡ ከመ ኢይብላዕ እማእደ ንጉሥ ወከመ ኢይስተይ እምወይኑ ወአስተብቀሩ ለሊቀ ሕጽዋን ከመ ኢያብልዖ።

Dan. 1:9 ወወሀቦ እግዚአብሔር ለዳንኤል ሣህለ ወምሕረተ በቅድመ ሊቀ ሕጽዋን።

Dan. 1:10 ወይቤሎ ሊቀ ሕጽዋን ለዳንኤል እፈርሆ አነ ለእግዚእየ ንጉሥ እስመ አዘዘ ሲሳየከሙ ዘትበልዑ ወዘትሰትዩ ወለእመ ርእየከሙ ድግዱጋኒከሙ እምደቅ እለ ቢጽክሙ እፈርህ ኢይኩንነኒ ንጉሥ ርእስየ።

Dan. 1:11 ወይቤሎ ዳንኤል ለአሚሳድ ዘሢሞ ሊቀ ሕጽዋን ላዕለ ዳንኤል ወአናንያ ወአዛርያ ወሚሳኤል።

Dan. 1:12 አመክሮሙ ለአግብርቲክ ዐሥረ ዕለተ ወየሀቡነ እምዘርዐ ምድር ንብላዕ ወማየ ንስተይ።

Dan. 1:13 ወእምዝ ትሬኢ ነፍስተነ ወነፍስቶሙ ለደቅ እለ ይሴስዩ እማእደ ንጉሥ ወዘከመ ርኢክ ግብር ምስለ አግብርቲክ።

Dan. 1:14 ወሰምዐ ነገሮሙ ወአመክሮሙ ዐሥረ ዕለተ።

Dan. 1:15 ወኅሊፎ ዐሥር ዕለት ኅየሰት ነፍስቶሙ ወሠነየ ራእዮሙ እምእልክቱ ደቅ እለ ይሴስዩ እማእደ ንጉሥ።

Dan. 1:16 ወእምዝ ይነሥእ አሚሳድ ሲሳዮሙ ዘይበልዑ ወወይነ ዘይሰትዩ ወይሁቦሙ ዘርዐ ምድር ለአርባዕቲሆሙ ደቅ።

Dan. 1:17 ወወሀቦሙ እግዚአብሔር ጥበብ ወእእምሮ ወልቡና በኩሉ መጽሐፍ ወዳንኤል ኮነ ጠቢብ በኩሉ ራእይ ወበፍካሬ ሕልም።

Dan. 1:18 ወእምዝ ተፈጺሞ መዋዕል ዘአዘዘ ንጉሥ አምጽእዎሙ ኅቤሁ ወአብኦሙ ሊቀ ሕጽዋን ቅድመ ንጉሥ ናቡከደነፆር።

Dan. 1:19 ወተናገሮሙ ንጉሥ ወኢተረክበ በውስተ ኩሉ ከመ ዳንኤል ወአናንያ ወአዛርያ ወሚሳኤል ወቆሙ ቅድመ ንጉሥ።

Dan. 1:20 ወበኩሉ ነገረ ጥበብ ወምክር ዘኅሠሠ ንጉሥ በኅቤሆሙ ረከበ ትዕሥርተ እደ እምኩሉ ሰብኦ ሥራይ ወእምኩሉ ሰብኦ ሰገል እለ ውስተ መንግሥቱ ሀለዉ።

Dan. 1:21 ወነበረ ዳንኤል እስከ አሐቲ ዓመተ መንግሥቱ ለቂሮስ ንጉሥ።

Dan. 2:1 በካልእ ዓመት ዘመንግሥቱ ሐለመ ናቡከደነፆር ሕልመ ወደንገፀት መንፈሱ ወረስዐ ሕልም።

Dan. 2:2 ወአዘዘ ንጉሥ ይጸውዑ ሰብኦ ሥራይ ወሰብኦ ሰገል ወጠቢባነ ወለባውያነ ወማእምራነ ከመ ይንግርዎ ሕልም ለንጉሥ ወመጽኡ ወቆሙ ቅድመ ንጉሥ።

Dan. 2:3 ወይቤሎሙ ንጉሥ ሐለምኩ ሕልመ ወደንገፀት ነፍስየ ወረሳዕኩ ሕልምየ።

Dan. 2:4 ወተናገርዎ ጠቢባን ከለዳውያን ለንጉሥ በሱርስት ወይቤልዎ ንጉሥ ሕየው ለዓለም ወአንተ ንግሮሙ ለአግብርቲክ ሕልመክ ወናየድዐክ ፍካሬሁ።

Dan. 2:5 ወተሠጥዎሙ ንጉሥ ወይቤሎሙ ለጠቢባን ተረስዐኒ ነገሩ ወእምከመ ኢታየድዑኒ ሕልምየ ወኢትፈክሩ ሊተ ትመውቱ ወአብያቲክሙ ይትበረበሩ ወንዋየክሙ።

Dan. 2:6 ወእመሰ አይዳዕክሙኒ ሕልምየ ወፈከርክምዎ ሊተ ትነሥኡ ፍተክሙ ወዐስበክሙ ወብዙኅ አከብረክሙ ወዳእሙ አይድዐኒ ሕልምየ ወንግሩኒ ፍካሬሁ።

Dan. 2:7 ወአውሥእዎ ዳግመ ወይቤልዎ ንጉሥ ይንግሮሙ ሕልሞ ለአግብርቲሁ ወፍካሬሁስ ንሕነ ንንግሮ።

Dan. 2:8 ወተሰጥዎሙ ንጉሥ ወይቤሎሙ አማን አእመርኩ አነ ከመ ታስተኅፍሩኒ እስመ ተረስዓኒ ነገሩ።

Dan. 2:9 ወእምከመ ይእዜ ኢትነግሩኒ ሕልምየ አእመርኩ አነ ከመ ተኅሥሡ ሊተ ወትፈቅዱ ትፍጥሩ ነገረ ሐስት ቅድሜየ ወአይድዐኒ ሕልምየ ዘእንበለ ይኅልፍ ጊዜሁ ወአአምር ከመ ፍካሬሁኒ ትነግሩኒ።

Dan. 2:10 ወአውሥኡ ካዕበ ጠቢባን በቅድመ ንጉሥ ወይቤሎ አልቦ ሰብእ በዲበ ምድር ዘይክል አእምሮ ነገሩ ለንጉሥ ወአልቦ ንጉሥ ዐቢይ ወመልአክ ዘይሴአል ዘከመ ዝ ነገረ በኅበ ጠቢባን ወሰብአ ሰገል ወሰብአ ሥራይ።

Dan. 2:11 እስመ ዕጹብ ዝ ነገር ዘይሴአል ንጉሥ ወአልቦ ባዕድ ዘይነግሮ ለንጉሥ ሕልሞ ዘእንበለ አማልክት እለ ኢኮነ ንብረቶሙ ምስለ ኩሉ ዘሥጋ።

Dan. 2:12 ወሶቤሃ ተምዐ ንጉሥ ዐቢየ መዓተ ወይቤ ይቅትልዎሙ ለኩሎሙ ጠቢባነ ባቢሎን።

Dan. 2:13 ወወፅአ ትእዛዝ እምኅበ ንጉሥ ወአኅዙ ይቅትልዎሙ ወኅሥሥዎሙ ለዳንኤል ወለአዕርክቲሁ ከመ ይቅትልዎሙ።

Dan. 2:14 ወተናገሮ ሶቤሃ ዳንኤል ለአርዮክ ሊቀ መበስላኒ ለንጉሥ ዘወፅአ ይቅትሎሙ ለጠቢባነ ባቢሎን።

Dan. 2:15 ወተስእሎ ወይቤሎ ለአርዮክ ሊቀ መበስላኒ ለንጉሥ በእንተ ምንት ወፅአ ትእዛዝ ዕጹብ እምቅድመ ንጉሥ ወነገሮ አርዮክ ለዳንኤል።

Dan. 2:16 ወቦአ ዳንኤል ወአስተብቀሩ ከመ የዕድሞ እስከ ሠሉስ ዕለት ወይንግሮ ሕልሞ ወይፈከር ሎቱ።

Dan. 2:17 ወቦአ ዳንኤል ቤቶ ወነገሮሙ ዘነገረ ለአዕርክቲሁ ለአናንያ ወአዛርያ ወሚሳኤል።

Dan. 2:18 ወሰአሉ ሣህለ እምኅበ አምላክ ሰማይ በእንተ ዝ ኩሉ ነገር ዘኅቡእ ከመ ኢይሙቱ ዳንኤል ወአዕርክቲሁ ምስለ ኩሎሙ ጠቢባነ ባቢሎን።

Dan. 2:19 ወእምዝ ተከሥተ ሎቱ ለዳንኤል በራእየ ሌሊት ወአእኩቶ ዳንኤል ለአምላክ ሰማይ።

Dan. 2:20 ወይቤ ይትባረክ ስመ እግዚአብሔር ለዓለም ወእስከ ለዓለም እስመ ሎቱ ጥበብ ወምክር ወኅይል።

Dan. 2:21 ወውእቱ ይዌልጥ ዓመታተ ወመዋዕለ ወያነብር ነገሥተ ወይሥዕር ወይሁቦሙ ጥበበ ለጠቢባን ወምክረ ለመካርያን።

Dan. 2:22 ወውእቱ ይከሥት ዘኅቡእ ወዘዕሙቅ ወየአምር ኩሎ ዘውስተ ጽልመት ወኅቤሁ ሀሎ ብርሃን።

Dan. 2:23 ወአንተ አምላክ አበዊነ እገኒ ለከ ወእሴብሐክ እስመ ወሀብከኒ ጥበበ ወአእምሮ ወነገርከኒ ዘአስተብቋዕኩከ ወአይዳዕከኒ ሕልሞ ለንጉሥ ወፍካሬሁ።

Dan. 2:24 ወሐረ ዳንኤል ኅበ አርዮክ ዘአዘዞ ንጉሥ ከመ ይቅትሎሙ ለጠቢባነ ባቢሎን ወይቤሎ ዳንኤል ኢትቅትሎሙ ለጠቢባነ ባቢሎን አብአኒ ቅድመ ንጉሥ ወአነ እነግሮ ለንጉሥ ሕልሞ ወፍካሬሁ።

Dan. 2:25 ወሶቤሃ ፍጡነ አብአ ለዳንኤል አርዮክ ቅድመ ንጉሥ ወይቤ ረከብኩ ብእሴ እምደቂቀ ሄዋ ይሁዳ ዘይነግሮ ለንጉሥ ሕልሞ ወፍካሬሁ።

Dan. 2:26 ወተሰጥዎ ንጉሥ ወይቤሎ ለዳንኤል ዘስሙ ዘተሰይመ ብልጣሶር ትክልኑ ትንግረኒ ሕልምየ ዘርኢኩ ወፍካሬሁ።

Dan. 2:27 ወአውሥአ ዳንኤል ቅድመ ንጉሥ ወይቤ ዝ ነገር ዘይሴአል ንጉሥ ኢኮነ ለጠቢባን ወኢ ለማእምራን ወኢ ለሰብአ ሰገል ወኢ ለሰብአ ሥራይ ዘይትከሠት ነገሩ ለንጉሥ።

Dan. 2:28 ዳእሙ ሀሎ አምላክ ውስተ ሰማይ ዘይከሥት ዘኅቡእ ወውእቱ አርአዮ ለንጉሥ ናቡከደነፆር ዘሀሎ ይኩን በደጋሪ መዋዕል ወከመ ዝ ወእቱ ሕልምክ ዘርኢክ ወርኢክ ርእሰክ በውስተ ምስካብክ ኦ ንጉሥ።

Dan. 2:29 እስመ ኅለይክ ምንተ ይከውን እምድኅሬክ ወዘይከሥት ኅቡአ አርአየክ ዘሀሎ ይኩን።

Dan. 2:30 ወአነሂ አኮ በጥበብየ እምኩሉ ዕጻለ እመሕያው ዘተከሥተ ሊተ ዘኅቡእ ዳእሙ ከመ እንግሮ ለንጉሥ ፍካሬሁ ከመ ታእምር ዘኅለይክ በልብክ።

Dan. 2:31 አንተ ንጉሥ ርኢክ ወናሁ ምስል አሐዱ ዐቢይ ወገጹ ይኔጽር ቅድሜክ ወግሩም ራእዩ።

Dan. 2:32 ለውእቱ ምስል ርእሱ ዘወርቅ ጽሩይ እደዊሁ ወእንግድዓሁ ወመዝራዕቱ ዘብሩር ከርሡ ወሐቓሁ ዘብርት።

Dan. 2:33 ወኣቀላይሁ ዘጎሊን ወእምኒሆን መንፈቀ እገሪሁ ዘጎሊን ወመንፈቁ ልሕኩት።

Dan. 2:34 ወእንዘ ትኔጽር ተበትከ ዐቢይ እብን እምደብር ዘእንበለ እድ ወወረደ ዲበ እገሪሁ ዘጎሊን ወዘልሕኩት ወሐረጾ ለዝሉፉ።

Dan. 2:35 ወእምዝ ተሐርጸ በምዕር ልሕኩቱሂ ወጎሊኑሂ ወብርቱሂ ወብሩርሂ ወወርቁሂ ወኮነ ከመ ጸበለ ዐውድ ዘማእረር ወነሥእ ነፋሱ ኩሎ ወኢተዐውቀ መካኑ ኅበ ነበረ ወዝኩ እብን ዘቀጥቀጥ ለምስል ኮነ ደብረ ዐቢየ ወመልእ ኩሎ ምድረ።

Dan. 2:36 ዝ ውእቱ ሕልምከ ንጉሥ ወፍካፊሁኒ እነግር ቅድመ ንጉሥ።

Dan. 2:37 ኣንተ ንጉሥ ንጉሠ ነገሥት ዘወሀበከ ኣምላክ ሰማይ መንግሥተ ጽኑዐ ወጎይለ ወክብረ።

Dan. 2:38 ወኩሉ በሓውርት ኅበ ይነብሩ ደቂቀ ዕጻለ እመሕያው ወአራዊተ ገዳም ወአዕቆፈ ሰማይ ወዓሣተ ባሕር ወወሀበከ ውስተ እዴከ ወሄመከ እግዚእ ለኩሉ ኣንተ ውእቱ ርእሱ ዘወርቅ።

Dan. 2:39 ወእምድኅሬከ ይቀውም ካልእ ንጉሥ ዘይቴሐት እምኔከ ውእቱ ዝኩ ዘብሩር ወዝኩሰ ዘብርት ሣልስ መንግሥት ውእቱ ዘይኳንን ኩሎ ምድረ።

Dan. 2:40 ወራብዕስ መንግሥት ጽኑዕ ውእቱ ከመ ኅጺን ወበከመ ኅጺን ያደክሞ ለኩሉ ወያወድቆ ከማሁ ይመውእ ለኩሉ ወያገርሮ።

Dan. 2:41 ወዝኒ ዘርኢከ እገሪሁ ወአጸብዒሁ መንፈቁ ልሕኩት ወመንፈቁ ኅጺን እስመ መንግሥቱ ንፋቅ ውእቱ ወእምጉንዱ ለኅጺን ይከውን ውስቴቱ ዘከመ ርኢከ ኅጺን ኢ ድሙር ምስል ልሕኩት።

Dan. 2:42 ወአጸብዕ እገሪሁ መንፈቁ ኅጺን ወመንፈቁ ልሕኩት እስመ መንፈቁ መንግሥቱ ጽኑዕ ወመንፈቁ ይትቀጠቀጥ።

Dan. 2:43 ወዝኒ ዘርኢከ ከመ ኅጺን ወልሕኩት እንዘ ኢ ድሙር በልሕኩት ሕዉስ ከማሁ ሕዉሳን እሙንቱ ለዘርዕ ዕጻለ እመሕያው ወኢኮኑ ድሙራኑ ዝኩ ምስል ዝኩ።

Dan. 2:44 ወበከመ ርኢከ ኢይዴመር ኅጺን ምስል ልሕኩት ዝኒ ዘርኢከ እብን ዘተበትከ እምደብር ዘእንበለ እድ በመዋዕሊሆሙ ለእሙንቱ ነገሥት ይመጽእ ኣምላክ ሰማይ ወይነሥእ መንግሥተ ዘለዓለም ዘኢየጎልቅ ወዘኢይትወሀብ ለካልእ ሕዝብ።

Dan. 2:45 ወመንግሥቱ ይመውእ ወያገርር ኩሎ መንግሥተ ወውእቱ ይቀውም ለዓለም።

Dan. 2:46 ወዘከመ ርኢከ እምደብር ተበትከ ወወረደ እብን ዘእንበለ እድ ወሐረጸ ልሕኩቱሂ ወጎሊኖሂ ወብርቶሂ ወብሩሮሂ ወወርቆሂ ኣምላክ ዐቢይ አርአዮ ለንጉሥ ዘሀሎ ይኩን በደጋሪ መዋዕል ወከመ ዝ ውእቱ ሕልምከ እሙን ሕልሙ ወርቱዕ ፍካፊሁ።

Dan. 2:47 ወሶቤሃ ሰገደ ንጉሥ ናቡከደነፆር በገጹ ለእግዚአብሔር ወሰገደ ለዳንኤል ወአክበሮ ፈድፋደ ወወሀበ መሐና ወመዓረ ወመዓዛ ሠናየ ኣዘዘ ሎቱ።

Dan. 2:48 ወተሰጥዎ ንጉሥ ለዳንኤል ወይቤሎ ኣማን ውእቱ ኣምላክክሙ ኣምላክ ኣማልክት ወእግዚአ ኣጋእዝት ወንጉሠ ነገሥት ዘይከሥት ዘኅቡእ እስመ ክህልከ ኣእምሮ ዘንተ ዘክዱን።

Dan. 2:50 ወአዕበዮ ንጉሥ ለዳንኤል ውበዙኅ ፈተቶ ወወሀበ ዐቢያተ ወሄሞ ለኩሉ በሓውርተ ባቢሎን መልእክ ወመኩንን ለኩሉ ጠቢባነ ባቢሎን።

Dan. 2:51 ወሰኦለ ዳንኤል ኅበ ንጉሥ ወሄሞሙ ለሲድራቅ ወሚሳቅ ወአብደናጎ ላዕለ ኩሉ ግብረ በሓውርተ ባቢሎን ወዳንኤልስ ውስተ ዐጸደ መንግሥት።

Dan. 3:1 ወእመ ዐሠርቱ ወሰመንቱ ዓመተ መንግሥቱ ለናቡከደነፆር ንጉሥ ገብረ ምስል ዘወርቅ ኑጉ ስሳ በእመት ወግድሙ ስድስ በእመት ወአቀሞ ውስተ ሐቅለ ዱራ ዘብሔረ ባቢሎን።

Dan. 3:2 ወለኦከ ያስተጋብኡ መኳንንተ ወመላእክተ ወመሳፍንተ ወመገብተ ወበይተ ወነገሥተ ወኩሎሙ መላእክተ በሓውርተ ባቢሎን ይምጽኡ ለመድቅሐ ውእቱ ምስል ዘአቀሞ ናቡከደነፆር ንጉሥ።

Dan. 3:3 ወተጋብኡ መኳንንት ወመላእክት ወመሳፍንት ወመገብት ዐበይት ወነገሥት ወመላእክተ በሓውርት ለመድቅሐ ውእቱ ምስል ዘአቀሞ ናቡከደነፆር ንጉሥ ወቆሙ ቅድመ ምስል።

Dan. 3:4 ወከልሐ ዐዋዲ በሕቁ በጎይል ወይቤለክሙ ይብሉክሙ ንጉሥ ኣሕዛብ ወሕዝብ ወበሓውርት።

Dan. 3:5 እምከመ ሰማዕክሙ ቃለ ቀርን ወዕንዚራ ወመሰንቆ ወብዕዛ ወማሕሌተ ወኩሎ ንዋየ ተውኔት ግነዩ ወስግዱ ለምስል ዘወርቅ ዘአቀመ ናቡከደነፆር ንጉሥ።

Dan. 3:6 ለዘኢገነየ ወለዘኢሰገደ በጊዜሃ ይወድይዎ ውስተ እቶነ እሳት ዘይነድድ።

Dan. 3:7 ወእምዝ ሶበ ሰምዑ ሕዝብ ወአሕዛብ ወበሓውርት ቃለ ቀርን ወዕንዚራ ወመሰንቆ ወብዕዛ ወማሕሌተ ወንዋየ ተውኔት ገዢ ኩሉ ሕዝብ ወአሕዛብ ወበሓውርት ወሰገዱ ለምስል ዘወርቅ ዘአቀም ናቡከደነፆር ንጉሥ።

Dan. 3:8 ወእምዝ መጽሐ ሰብአ ፋርስ ወአስተዋደይዎሙ ለአይሁድ ኅበ ናቡከደነፆር ንጉሥ።

Dan. 3:9 ወይቤልዎ ንጉሥ ለዓለም ሕየው።

Dan. 3:10 ወአንተ ንጉሥ አዘዝከ በቃልከ ትእዛዝ ለኩሉ አሕዛብ እምከመ ሰምዑ ቃለ ቀርን ወእንዚራ ወመሰንቆ ወብዕዛ ወማሕሌተ ወከበሮ ወኩሉ ተውኔተ ይግነዩ ወይስግዱ ለምስል ዘወርቅ።

Dan. 3:11 ለዘኢገዢ ወለዘኢሰገደ ለምስል ዘወርቅ ናቡከደነፆር ንጉሥ ይደይዎ ውስተ እቶነ እሳት ዘይነድድ።

Dan. 3:12 ወይእዜኒ ሀለዉ ሠለስቱ ዕደው አይሁድ እለ ሄምኮሙ ለግብረ በሓውርተ ባቢሎን ሲድራቅ ወሚሳቅ ወአብደናን እለ አበዩ ትእዛዝከ ወኢያምለኩ አምላከከ ወኢሰገዱ ለምስል ዘወርቅ ዘገበርኩ።

Dan. 3:13 ወሶቤሃ ተምዐ ንጉሥ ናቡከደነፆር ወአዘዘ በመዓት ያምጽእዎሙ ለሲድራቅ ወሚሳቅ ወአብደናን ወአምጽእዎሙ ወቆሙ ቅድመ ንጉሥ።

Dan. 3:14 ወተሠጥዎሙ ናቡከደነፆር ወይቤሎሙ አማንክሙኑ ሲድራቅ ወሚሳቅ ወአብደናን ለምንት ዘኢታመልኩ አምላኪዩ ወዘኢትሰግዱ ለምስል ዘወርቅ ዘገበርኩ።

Dan. 3:15 ወይእዜኒኬ እመ ጥቡዓን አንትሙ እምከመ ሰማዕክሙ ቃለ ቀርን ወእንዚራ ወመሰንቆ ወማሕሌተ ወከበሮ ወብዕዛ ወኩሉ ተውኔተ እስኩ ለምንት ኢትገነዩ ወኢትሰግዱ ለምስል ዘወርቅ ዘገበርኩ ወእምከመ ኢሰገድክሙ ለምስል ዘወርቅ በጊዜሃ ይወድዩክሙ ውስተ እቶነ እሳት ዘይነድድ ወመኑ ውእቱ እግዚአብሔር ዘያድሳክሙ እምእዴየ።

Dan. 3:16 ወአውሥእዎ ሲድራቅ ወሚሳቅ ወአብደናን ለናቡከደነፆር ንጉሥ ወይቤልዎ ኢንፈቅድ ንሕነሰ ንሰጠውከ በዝ ነገር።

Dan. 3:17 ሀሎ አምላክነ ውስተ ሰማይ ዘኪያሁ ናመልክ ንሕነ ወይክል አድሳኖተነ እምእዴከ ወእምእቶነ እሳት ዘይነድድ ወያነግፈነ እምእዴከ ንጉሥ።

Dan. 3:18 ከመ ታእምር ኦ ንጉሥ አምላክነኪ ኢናመልክ ወለምስልሂ ዘወርቅ ዘአቀምከ ኢንሰግድ።

Dan. 3:19 ወሶቤሃ ተምዐ ናቡከደነፆር ንጉሥ በሕቁ ወተወለጠ ርእየተ ገጹ በላዕለ ሲድራቅ ወሚቅ ወአብደናን ወአዘዘ ያንድዱ እቶነ እሳት ምስብዒተ እስከ በሕቁ ይውዒ።

Dan. 3:20 ወአዘዘ ዕደወ ጽኑዓነ ወኅያላነ ይእስርዎሙ ወይጸድፍዎሙ ወይውርዎሙ ለሲድራቅ ወሚሳቅ ወአብደናን ውስተ እቶነ እሳት ዘይነድድ።

Dan. 3:21 ወሶቤሃ እሙንቱ ዕደው አሠርዎሙ እደዊሆሙ ወእገሪሆሙ ምስለ ድርማንቃቲሆሙ ወምስለ አሣእኒሆሙ ወምስለ አልባስ አቅያዲሆሙ ወምስለ አክሊላቲሆሙ ወወረውዎሙ ውስተ እቶነ እሳት ዘይነድድ እስመ ኅየለ ቃለ ንጉሥ ጥቀ።

Dan. 3:22 ወአንደዱ እቶነ እሳት በሕቁ ምስብዒተ።

Dan. 3:23 ወወረዱ እሉ ሠለስቱ ደቂቅ ሲድራቅ ወሚሳቅ ወአብደናን ማእከለ እቶነ እሳት ዘይነድድ እንዘ እሱራን እደዊሆሙ ወእገሪሆሙ።

Dan. 3:24 ወአንሶሰዉ ማእከለ እቶነ እሳት ወአእኩትዎ ለእግዚአብሔር ወባረክዎ።

Dan. 3:25 ወቆመ አዛርያ ወጸለየ ከመ ዝ ወከሠተ አፉሁ ማእከለ እሳት።

Dan. 3:26 ወይቤ ይትባረክ እግዚአብሔር አምላክ አበዊነ እኩት ወስቡሕ ስምከ ለዓለም።

Dan. 3:27 እስመ አንተ ጻድቅ በኩሉ ዘአምጸእከ ላዕሌነ እሙን ኩሉ ግብርከ ወርቱዕ ኩሉ ፍናዊከ ወጽድቅ ኩሉ ኩነኔከ።

Dan. 3:28 ወግበር ፍትሐ ወርትዐ በኩሉ ዘገበርከ ለነ ወዲበ ሀገረ አበዊነ ኢየሩሳሌም ቅድስት እስመ በኩነኔ ጽድቅከ አምጸእከ ዘኩሉ በእንተ ኅጢአትነ።

Dan. 3:29 እስመ አበስነ ወጊገይነ ዘኅደግናከ ዐመፅነ በኩሉ ወኢሰማዕነ ትእዛዝከ።

Dan. 3:30 ኢዐቀብነ ወኢገበርነ በከመ አዘዝከነ ከመ ይኩን ሠናየ ላዕሌነ።

Dan. 3:31 ኩሉ ዘአምጸእከ ላዕሌነ ወኩሉ ዘገበርከ ዲቤነ በኩነኔ ጽድቅከ ገበርከ።

Dan. 3:32 ወመጠውከነ ውስተ እደ ፀርነ ኃጥኣን ወዐላውያን እለ ርሑቃን ወግሑሣን እምኔከ ወንጉሥ ዐማፂ ወእኩይ እምኩሉ ምድር።

Dan. 3:33 ወይእዜኒ አኮ ድልወት ለነ ንክሥት አፉነ ኅፍረት ወዝንጓጌ ኮኖሙ ለአግብርቲከ ለእለ ይፈርሁከ።

Dan. 3:34 ወኢትመጥወነ ለግሙራ በእንተ ስምከ ወኢትሚጥ ኪዳነከ።

- Dan. 3:35 ወኢታርሕቅ ምሕረተክ እምኔን በእንተ አብርሃም ፍቁርክ ወበእንተ ይስሐቅ ቊልዔክ ወበእንተ እስራኤል ቅዱስክ።
- Dan. 3:36 እለ ተናገርኩሙ ወትቤሎሙ ከመ ታብዝኅ ዘርዖሙ ከመ ኮከበ ሰማይ ወከመ ጥጻ ዘድንጋገ ባሕር።
- Dan. 3:37 እስመ ውጉዳን እሙንቱ እምኩሉ አሕዛብ። ወኮነ ኅሱራነ በኩሉ ምድር ዮም በእንተ ኅጢአትነ።
- Dan. 3:38 አልቦ በዝ መዋዕል መልአክ ኢ ነቢይ ወኢ ንጉሥ ኢ ቊርባን ወኢ መሥዋዕት ወኢ ኅበ ያጸንሕሉ ዕጣነ ወኢ ብሔር ኅበ እለ ይፈርዩ በቅድሜክ ይርከቡ ሣህለክ።
- Dan. 3:39 ዘእንበለ በነፍስ የዋህ ወበመንፈስ ትሑት ተወከፍ ለነ።
- Dan. 3:40 ከመ ዘመሥዋዕተ ሐራጊት ወአልሕምት ወከመ ዘአእላፍ አባግዕ ሥቡሓን ከማሁ ይኩን መሥዋዕቲነ በቅድሜክ ዮም ወፍጹመ ይኩን በኅቤክ ከመ ኢይትኅፈሩ ኩሎሙ እለ ይትዌከሉ ብክ።
- Dan. 3:41 ወይእኬኒ ንተልወክ በኩሉ ልብነ ወንፈርህክ ወንኅሥሥ ገጸክ ዳእሙ ኢታስተኅፍረነ።
- Dan. 3:42 ወግበር ምስሌን በከመ ተመይጦትክ ወበከመ ብዝኅ ምሕረትክ አድኅነን በተአምሪክ ሀብ አኩቴተ ለስምክ እግዚአ።
- Dan. 3:43 ይትኅፈሩ ኩሎሙ እለ ያሐሥሙ ላዕለ አግብርቲክ ወይትኅፈሩ ወይኅስሩ በኩሉ ትዕግልቶሙ ወይትቀጥቀጥ ኅይሎሙ።
- Dan. 3:44 ወያእምሩ ከመ አንተ እግዚአብሔር አምላክ ባሕቲትክ ስቡሕ በኩሉ ምድር ወበኩሉ ዓለም።
- Dan. 3:45 ወኢኅደጉ ወዓልት አስተዋድዮቶሙ ኅበ ንጉሥ።
- Dan. 3:46 ወወደጡ ውስተ እሳቱ ተየ ወፒሳ ወስጠጽዮነ ወቀለምጹዳ ወአስፈሊጠ።
- Dan. 3:47 ወተለዐለ ነበልባሉ እምእቶን አርብዓ ወተሰዓተ እመተ።
- Dan. 3:48 ወያንሶሱ ወያውዒ ዘረከቡ ኅበ እቶኖሙ ለከለዳውያን።
- Dan. 3:49 ወወረደ መልአክ እግዚአብሔር ምስለ እለ አዛርያ ወሚሳኤል ውስተ እቶነ እሳት ዘይነድድ ወዘበጦ ለነበልባለ እሳተ እቶን።
- Dan. 3:50 ወረሰዮ ለነበልባለ እሳት ከመ ነፋስ ቈረር ወኢለከፎሙ እሳት ለእሙንቱ ወኢ ምንትኒ ወኢሰሐጦሙ ሥዕርተ ርእሶሙ ወኢያጽዐቆሙ።
- Dan. 3:51 ወሶቤሃ እሙንቱ ሠለስቲሆሙ ኅቡረ ወበአሐዱ አፍ ወአእኩቱ ወባረክዎ ለእግዚአብሔር በውስተ እቶነ እሳት።
- Dan. 3:52 ወይቤሉ ይትባረክ እግዚአብሔር አምላክ አበዊነ ስቡሕኒ ውእቱ ወልዑልኒ ውእቱ ለዓለም ወይትባረክ ስመ ስብሐቲሁ ቅዱስ ስቡሕኒ ውእቱ ወልዑልኒ ውእቱ በኩሉ ዓለም።
- Dan. 3:53 ቡሩክ አንተ በጽርሐ ቅድሳተ ስብሐቲክ ስቡሕኒ አንተ ወእኩት አንተ ለዓለም።
- Dan. 3:54 ቡሩክ አንተ ዘትሬኢ ቀላያተ ነቢረክ ላዕለ ኪሩቤል ስቡሕኒ አንተ ወልዑል አንተ ለዓለም።
- Dan. 3:55 ቡሩክ አንተ በዲበ መንበረ መንግሥትክ ስቡሕኒ አንተ ወቡሩክ አንተ ለዓለም።
- Dan. 3:56 ቡሩክ አንተ በመልዕልተ ሰማያት ስቡሕኒ አንተ ወክቡር አንተ ለዓለም።
- Dan. 3:57 ይባርክዎ ኩሉ ግብረ እግዚእ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:58 ይባርክዎ ሰማያት ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:59 ይባርክዎ መላእክተ እግዚእ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:60 ይባርክዎ ኩሉ ማያት ዘመልዕልተ ሰማያት ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:61 ይባርክዎ ኩሉ ኅይለ እግዚእ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:62 ይባርክዎ ፀሓይ ወወርኅ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:63 ይባርክዎ ከዋክብተ ሰማይ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:64 ይባርክዎ ጠል ወዝናም ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:65 ይባርክዎ ኩሉ መንፈስ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:66 ይባርክዎ እሳት ወላህብ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:67 ይባርክዎ ሌሊት ወመዓልት ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:68 ይባርክዎ ጠል ወዐ ውል ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:69 ይባርክዎ ቊር ወአስሐትያ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:70 ይባርክዎ በርህ ወጽልመት ለእግዚአብሔር ስቡሕኒ ውእቱ ወልዑልኒ ውእቱ ለዓለም።

- Dan. 3:71 ይባርክዎ ደደክ ወመርቂ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:72 ይባርክዎ በረድ ወጊሜ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:73 ይባርክዎ መብረቅ ወደመና ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:74 ትባርኩ ምድር ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:75 ይባርክዎ አድባር ወአውግር ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:76 ይባርክዎ ኩሉ ዘይበቀሉ ውስተ ምድር ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:77 ይባርክዎ ቀላያት ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:78 ይባርክዎ ባሕር ወአፍላግ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:79 ይባርክዎ አንበር ወኩሉ ዘይትሐወስ ውስተ ማይ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:80 ይባርክዎ ኩሉ አዕዋፈ ሰማይ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:81 ይባርክዎ ኩሉ አራዊት ወእንስሳ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:82 ይባርክዎ ደቂቀ ዕንላ እመሕያው ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:83 ይባርክዎ እስራኤል ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:84 ይባርክዎ ካህናት እግዚእ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:85 ይባርክዎ አግብርተ እግዚእ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:86 ይባርክዎ መንፈስ ወነፍስ ጻድቃን ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:87 ይባርክዎ ጻድቃን ወትሑታነ ልብ ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:88 ይባርክዎ አናንያ ወአዛርያ ወሚሳኤል ለእግዚአብሔር ስቡሕኒ ውእቱ ወልዑልኒ ውእቱ ለዓለም።
- Dan. 3:89 እስመ አድጎነን እምእደ ሲኦል ወእዋት ባልሐን ወእምእቶን እሳት ዘይነድድ አንገፈነ ወአውፅኦን እማእከለ ነበልባል ግነዩ ለእግዚአብሔር ወጸውሁ ስም እስመ ኄር እስመ ለዓለም ምሕረቱ።
- Dan. 3:90 ባርክዎ ለእግዚአብሔር ኩልክሙ እለ ትፈርህዎ ለእግዚአብሔር ወግነዩ ለአምላክ አማልክት ሰብሕዎ ወግነዩ ሎቱ እስመ ለኩሉ ዓለም ምሕረቱ።
- Dan. 3:91 ወሰምዎሙ ለናቡከደነፆር እንዘ ይሴብሑ ወአንከረ ወተንሥኦ ፍጡነ ወይቤሎሙ ለመገብቱ አኮኑ ሠለስተ ዕደወ ወደይነ ማእከለ እቶን እሳት እሱራኒሆሙ ወይቤልዎ እወ ንጉሥ።
- Dan. 3:92 ወይቤ ንጉሥ አንስ እሬኢ ዝዩ አርባዕተ ዕደወ ፍቱሓነ ወያንሶስዉ ማእከለ እቶን እሳት ወአልቦ ዘለከፎሙ ወገጹ ለራብዓይ ከመ ወልደ እግዚአብሔር ይመስል።
- Dan. 3:93 ወእምዝ ሓረ ናቡከደነፆር ኅበ ፕሳተ እቶን እሳት ዘይነድድ ወይቤ ሲድራቅ ወሚሳቅ ወአብደናን አግብርተ እግዚአብሔር ልዑል ንዑ ዓኡ ወወፅኡ ሲድራቅ ወሚሳቅ ወአብደናን እማእከለ እቶን እሳት።
- Dan. 3:94 ወተጋብኡ መላእክት ወመገብት ወመኳንንት ወጎያላን ለንጉሥ ወርእይዎሙ ለእሙንቱ ዕደወ ከመ ኢቀረቦሙ እሳት ሥጋዎሙ ወኢለከፎሙ ሥዕርተ ርእሶሙ ወኢተወለጠ ርእየተ ገጾሙ ወአልቦ ላዕሌሆሙ ዔና ዘእሳት።
- Dan. 3:95 ወሰገደ ንጉሥ ለእግዚአብሔር በቅድሜሆሙ አውሥኦ ናቡከደነፆር ወይቤ ይትባረክ እግዚአብሔር አምላክ ሲድራቅ ወሚሳቅ ወአብደናን ዘፈነወ መልክኮ ወአድጎነ ነፍስ አግብርቲሁ እለ ተወከሉ ቦቱ ወሚጡ ቃለ ንጉሥ ወወሀቡ ነፍሶሙ ከመ ኢያምልኩ ወኢይስግዱ ለካልእ አምላክ ዘእንበለ አምላኮሙ።
- Dan. 3:96 ወአነሂ አዘዝኩ ለኩሉ አሕዛብ ወነገድ ወበሓውርት እመ ቦ ዘፀረፈ ላዕለ አምላክ ሲድራቅ ወሚሳቅ ወአብደናን ይትኩነን ነፍሱ ወይትበርበር ቤቱ እስመ አልቦ ካልእ አምላክ ዘያድጎን ከመ ዝ።
- Dan. 3:97 ወሶቤሃ ሄሞሙ ንጉሥ ለሲድራቅ ወሚሳቅ ወአብደናን ላዕለ ግብረ በሓውርተ ባቢሎን ወአዕቦሎሙ ወአኩነኖሙ ለኩሉ አይሁድ እለ ውስተ መንግሥቱ ሀለዉ።
- Dan. 3:98 ወይቤ ናቡከደነፆር ንጉሥ ለኩሉ አሕዛብ ወነገድ ወበሓውርት ወለኩሉ ምድር ሰላም ወዳጎና ይብዛኅ ለክሙ።
- Dan. 3:99 ተአምረ ወመንክረ ዘገብረ ሊተ እግዚአብሔር ልዑል አደመኒ በቅድሜዩ እንግርክሙ።
- Dan. 3:100 እስመ ዐቢይ ወጽኑዕ ውእቱ መንግሥቱ መንግሥት ዘለዓለም ወምኩናኑኒ ለትውልድ ትውልድ።
- Dan. 4:1 ኣነ ናቡከደነፆር እንዘ እትፌሣሕ ወእትሐሠይ በቤትዩ ወእዴሎ ሐለምኩ ሕልመ ወገረመኒ።
- Dan. 4:2 ወደንገፀኒ ልብዩ በውስተ ምስካብዩ እምራእዩ ርእሰዩ ተሀውከኒ ኅሊናየ።
- Dan. 4:3 ወኣነ አዘዝኩ ይባኡ ኅቤዩ ኩሎሙ ጠቢባነ ባቢሎን ከመ ይንግሩኒ ፍካሬሁ ለሕልምዮ።

Dan. 4:4 ወመጽኡ ሰብአ ሰገል ወሰብአ ሥራይ ወማእምራን ወመፈክራን ወነገርክዎሙ ኣነ ሕልምየ ቅድሚሆሙ ወኢይድዑኒ ፍካሬሁ።

Dan. 4:5 እስከ ኣመ ቦአ ዳንኤል ዘስሙ ብልጣሶር በስመ ኣምላኩ ዘመንፈሰ እግዚአብሔር ቅዱስ ላዕሌሁ።

Dan. 4:6 ወእቤሉ ለብልጣሶር መልአኮሙ ለአጳይዶን ወኣነ ኣእመርኩ ከመ መንፈሰ እግዚአብሔር ላዕሌከ ወኹሉ ዘኅቡእ ኢይሰዐነከ ሰማዕ ነገረ ሕልምየ ዘርኢኩ ወንግረኒ ፍካሬሁ።

Dan. 4:7 ርኢኩ በውስተ ምስካብየ ወናሁ ዕፅ ዐቢይ በውስተ ማእከለ ምድር ወነዊኅ ጥቀ።

Dan. 4:8 ወዐቢይ ዕፅ ወጽኑዕ ወበጽሐ ቆሙ እስከ ሰማይ ወአዕጹቂሁ እስከ ኣጽናፈ ምድር።

Dan. 4:9 ወሠናይ ቈጽሉ ወፍሬሁኒ ብዙኅ ወኹሉ ይሴሰይ እምኔሁ ወያጸልሉ ታሕቲሁ ኣራዊተ ገዳም ወይነብሩ ውስተ ኣዕጹቂሁ ኣዕዋፈ ሰማይ ወእምኔሁ ይበልዑ ኹሉ ዘሥጋ።

Dan. 4:10 ወርኢኩ በራእየ ሌሊት በውስተ ምሳካብየ ወናሁ ኤር ቅዱስ ወልዑል እምሰማይ ወረደ ወከልሐ በኅይል።

Dan. 4:11 ወከመ ዝ ይቤ ግዝምዎ ለዝ ዕፅ ወኣውዕዩ ኣዕጹቂሁ ወንግፉ ቈጽሎ ወዝርወ ፍሬሁ ወይትሀወኩ ኣራዊት ዘታሕቲሁ ወኣዕዋፍኒ ዘውስተ ኣዕጹቂሁ።

Dan. 4:12 ዳእሙ ሥርዎ ወጉንዶ ኅድጉ ውስተ ምድር በመዋቅሕተ ኅጺን ውብርት ወውስተ ሐመልማል ዘኣፍኣ ወበጠለ ሰማይ ይንበር ወምስለ ኣራዊተ ገዳም ይኩን መክፈልቱ ወውስተ ሣዕረ ገዳም ይትረዐይ።

Dan. 4:13 ወይትወለጥ ልቡ እምሰብእ ወይትወሀቦ ልብ ኣራዊት ሰብዐቱ ዓመት እስከ የኅልፍ ላዕሌሁ።

Dan. 4:14 በኹነኔ ልዑል ወበቃለ ቅዱስ ተኣዛዚ ከመ ያእምሩ ኹሎሙ ሕያዋን ከመ እግዚአብሔር ይኳንን መንግሥተ ዕገለ እመሕያው ወለዘፈቀደ ይሁብ ወበትዕቢቱ ለሰብእ የኅስሮ።

Dan. 4:15 ከመ ዝ ሕልምየ ዘሐለምኩ ኣነ ናቡከደነፆር ንጉሥ ፍካሬሁ ንግረኒ እስመ ኹሎሙ ጠቢባነ መንግሥትየ ስእኑ ነጊሮትየ ፍካሬሁ ወኣንተሰ ዳንኤል ትክል ነጊሮትየ ፍካሬሁ እስመ መንፈሰ እግዚአብሔር ላዕሌከ።

Dan. 4:16 ወሶቤሃ ዳንኤል ዘስሙ ብልጣሶር ኅለየ መጠነ ኣሐቲ ሰዓት ወተሀውከ ኅለናሁ ወተሰጥዎ ለንጉሥ ብልጣሶር ወይቤ እግዚእየ ይኩን ሕልምከ ላዕለ ጸርከ ወፍካሬሁ ላዕለ ጸላእትከ።

Dan. 4:17 ዕፅ ዘርኢከ ዐቢይ ወጽኑዕ ወበጽሐ ኑጉ ሰማየ ወስፍሑ እስከ ኣጽናፈ ምድር።

Dan. 4:18 ወቈጽሉኒ ፅፉቅ ወፍሬሁኒ ብዙኅ ወኹሎሙ ይሴሰይ እምኔሁ ወይነብሩ ታሕቲሁ ኣራዊተ ገዳም ወያጸልሉ ኅበ ኣዕጹቂሁ ኣዕዋፈ ሰማይ።

Dan. 4:19 ኣንተ ውእቱ ንጉሥ ዘዐበይከ ወጸናዕከ ወፈድፈደ ዐበይከ ወበጽሐ ስምከ እስከ ሰማይ ወኹነኔከ እስከ ኣጽናፈ ምድር።

Dan. 4:20 ወዝኒ ዘርኢከ ንጉሥ ኤር ቅዱስ ወልዑል ዘወረደ እምሰማይ ወይቤ ግዝምዎ ለዝ ዕፅ ወኣማሰንዎ ወኣውዕዩ ኣዕጹቂሁ ወዘርወዉ ፍሬሁ ወይትሀወኩ ኣራዊት ዘታሕቲሁ ወኣዕዋፍኒ ዘውስተ ኣዕጹቂሁ ወዳእሙ ሥርዎ ወጉንዶ ኅድጉ ውስተ ምድር ወበመዋቅሕተ ኅጺን ውብርት እስርዎ ወውስተ ሐመልማል ዘኣፍኣ ይንበር ወበጠለ ሰማይ ወምስለ ኣራዊተ ገዳም ይኩን መክፈልቱ ወውስተ ሣዕረ ገዳም ይትረኣይ እስከ የኅልፍ ሰብዐቱ ዓመት ላዕሌሁ።

Dan. 4:21 ዝንቱ ውእቱ ፍካሬሁ ንጉሥ ወኹነኔ ልዑል በጽሐ ለእግዚእየ ንጉሥ።

Dan. 4:22 ወይሰድዱከ እምሰብእ ወትነብር ውስተ ኣራዊተ ገዳም ወትትረዐይ ሣዕረ ከመ ኣሕም ወትነብር ኅበ ጠለ ሰማይ ወሰብዐቱ ዓመት የኅልፍ ላዕሌከ እስከ ተኣምር ከመ ልዑል ይኳንን መንግሥተ ዕገለ እመሕያው ወለዘፈቀደ ይሁቡ።

Dan. 4:23 ወዝኒ ዘይቤ ኅድጉ ሥርዎ ወጉንዶ ለዕፅ ውስተ ምድር መንግሥትከ ለከ ይጸንሐከ እስከ ተኣምር ኹነኔ ዘእምሰማይ።

Dan. 4:24 ወበእንተ ዝ ንጉሥ ያሥምርከ ምክርየ በምጽዋት ወበጽድቅ ትድኅን ወኹሉ ኅጢአትከኒ ወጌጋየከ በምሒረ ነዳይ ይሠሪ ለከ እግዚአብሔር።

Dan. 4:25 ዝ ኹሉ በጽሐ ለናቡከደነፆር ንጉሥ።

Dan. 4:26 እምድኅረ ዐሠርቱ ወክልኤቱ ኣውርኅ መጽኣ ወበጽሐ ኅበ ጽርሐ መንግሥቱ ዘባቢሎን።

Dan. 4:27 ወእንዝ ያንሶሶ ተሰጥወ ንጉሥ ወይቤ ኣኮኑ ዛቲ ባቢሎን ዐባይ ሀገር እንተ ሐወጽክዋ ሊተ ለቤተ መንግሥትየ በጽንዐ ኅይልየ ወበትርሲተ መንግሥትየ ወክብርየ።

Dan. 4:28 ወእንዝ ዓዲ ቃል ውስተ ኣፈ ንጉሥ መጽኣ ቃል እምሰማይ ወይቤሎ ለከ ይብለከ ናቡከደነፆር ንጉሥ ኅለፈት መንግሥትከ እምኔከ።

Dan. 4:29 ወይስድዱክ እምሰብእ ወትነብር ምስለ አራዊተ ገዳም ወትትረዐይ ሣዕረ ከመ ላሕም ወየኅልፍ ላዕሌክ ሰብዐቱ ዓመት እስከ ተአምር ከመ ልዑል ይኔንን መንግሥተ ዕንላ እመሕያው ወለዘፈቀደ ይሁቡ።

Dan. 4:30 ወውእተ አሚረ በጽሐ ለናቡከደነፆር ንጉሥ ዝ ነገር ወሰደድዎ እምሰብእ ወተርዕየ ሣዕረ ከመ ላሕም ወተሄረየ ሥጋሁ እምጠለ ሰማይ እስከ ልህቀ ሥዕርቱ ከመ ዘእንበሳ ወጽፈሪሁኒ ከመ ዘንስር።

Dan. 4:31 ወእምድኅረ እማንቱ መዋዕል ኣነ ናቡከደነፆር ኣንሣእኩ አዕይንትየ ውስተ ሰማይ ወገብኣኒ ልብየ ወባረክዎ ለእግዚአብሔር ልዑል ወአእኩትክዎ ለዘሕያው ለዓለም ወሰባሕክዎ ለዘምኹናን ዘለዓለም ወመንግሥቱኒ ለትውልደ ትውልድ።

Dan. 4:32 ወኹሎሙ እለ ይነብሩ ውስተ ምድር ከመ ወኢ ምንት እሙንቱ ወይገብር ዘከመ ፈቀደ በኅይለ ሰማይ ወበዘሂ ይነብር ዲበ ምድር ወአልቦ ዘይትቃወማ ለእዴሁ ወይቤሎ ምንተ ገበርከ።

Dan. 4:33 ውእተ ጊዜ ገብኣኒ ልብየ ወመጻእኩ ውስተ ክብረ መንግሥትየ ወተሠውጠ ኅሊናየ ወገብኣኒ ራእይየ ወኅብርየ ወገሠሠኒ መገብትየ ወመላእክትየ ጸናዕኩ ውስተ መንግሥትየ ወተወሰኩ ዕበየ ፈድፋድ።

Dan. 4:34 ወይእዜኒ ኣነ ናቡከደነፆር እቤብሐ ወአእኩቶ ለእግዚአብሔር ወአልዕሎ ለንጉሠ ሰማይ እስመ ጽድቅ ቃሉ ወርቱዕ ኹሉ ፍናዊሁ ወለኹሎሙ እለ የሐውሩ በትዕቢት ይክል ኣኅስሮቶሙ።

Dan. 5:1 ወብልጣሶር ንጉሥ ገብረ ምስሐ ለመገብቱ ወአስተጋብኣ ዐሠርቱ ምእተ ብእሴ ወአስተየ ወይነ ለዐሠርቱ ምእት ዕደው።

Dan. 5:2 ወእንዝ ይሰቲ ወይነ ብልጣሶር ሰኪሮ ይቤ ያምጽኡ ንዋየ ወርቅ ውብሩር ዘአምጽኦ ናቡከደነፆር ኣቡየ እምቤተ መቅደስ ዘኢየሩሳሌም ወይስተየ ቦቱ ንጉሥ ወመገብቱ ወመላእክቲሁ ወአንስቲያሁ ወዕቀሳባቲሁ።

Dan. 5:3 ወአምጽኡ ንዋየ ወርቅ ውብሩር ዘአውፅኦ እምነ ቤተ መቅደስ ዘኢየሩሳሌም ወስትዩ ቦቱ ንጉሥ ወመገብቱ ወመላእክቲሁ ወአንስቲያሁ ወዕቀሳባቲሁ ወይነ።

Dan. 5:4 ወአእኩቱ አማልክቲሆሙ ዘወርቅ ወዘብሩር ወዘብርት ወዘኅጺን ወዘልሕኩት።

Dan. 5:5 ወበይእቲ ሰዓት ወፅኦት ኣጽባዕተ እደ ሰብእ ወጸሐፈት ቅድመ ጥኅት ውስተ ምረገ ዐረፍት ዘቤተ ንጉሥ ወርእየ ንጉሥ ኣጽባዕተ እደ ሰብእ እንዝ ትጽሕፍ።

Dan. 5:6 ወሶቤሃ ጸልመ ገጹ ለንጉሥ ወደንገፀ ልቡ ወተፈትሐ መሌሊተ ሐቋሁ ወተጐድዐ ብረኪሁ።

Dan. 5:7 ወዐውየወ ንጉሥ በቃሉ ከመ ያምጽኡ ሎቱ ማርያነ ወሰብኦ ሰገል ወይቤሎሙ ለጠቢባነ ባቢሎን ዘእንበ ለዘአንብቦ ለዝገቱ መጽሐፍ ወነገረኒ ፍካሬሁ ኣለብሶ ሜላተ ወአዐንቆ ባዝግና ወርቅ ውስተ ክሣዱ ወእሠይም መኰንነ በውስተ ሣልስተ እደ መንግሥትየ።

Dan. 5:8 ወቦኡ ኹሎሙ ጠቢባነ ባቢሎን ወስእኑ ኣንብቦ ቃለ መጽሐፍ ወፍካሬሁኒ ኢነገርዎ ለንጉሥ።

Dan. 5:9 ወደንገፀ ብልጣሶር ወጸልመ ገጹ ወደንገፀ መገብቱ።

Dan. 5:10 ወቦኦት ንግሥት ቤተ ምሳሕ ወትቤሎ ለንጉሥ ለዓለም ሕየው ኢይደንግፀክ ልብክ ወኢይጽልምክ ገጽከ።

Dan. 5:11 ሁሎ ኣሐዱ ብእሲ በውስተ መንግሥትክ ዘቦ ላዕሌሁ መንፈስ እግዚአብሔር ቅዱስ ወበመዋዕለ ኣቡከኒ ተረክቦ ላዕሌሁ ጥብብ ወፍካሬ ሕልም ወሄም ኣቡከ ንጉሥ መልኦክ ጠቢባን ወማእምራን ወሰብኦ ሰገል ወሰብኦ ሥራይ።

Dan. 5:12 እስመ ፈድፈደ መንፈስ ዘላዕሌሁ ወጠቢብ ውእቱ ውስተ ፍካሬ ሕልም ወይነግር ዘኅቡእ ወይፈትሕ ዘስውር ዝ ውእቱ ዳንኤል ስሙ ወንጉሥ ሰመዮ ብልጣሶር ወይእዜኒ ለኣክ ይጸውዕዎ ወይንግርክ ፍካሬሁ።

Dan. 5:13 ወሶቤሃ ጸውዕዎ ወቦኦ ዳንኤል ቅድመ ንጉሥ ወይቤሎ ንጉሥ ለዳንኤል ኣንተኑ ዳንኤል ዘእምደቂቀ ጌዋ ይሁዳ ዘአምጽኦክ ንጉሥ እምይሁዳ።

Dan. 5:14 ሰማዕኩ በእንቲኣክ ከመ መንፈስ እግዚአብሔር ሁሎ ላዕሌክ ጥብብ ወምክር ወፍካሬ ሕልም ፈድፋደ ተረክቦ በላዕሌክ።

Dan. 5:15 ወይእዜኒ ቦሉ ቅድሚየ ጠቢባን ወሰብኦ ሰገል ወሰብኦ ሥራይ ወማእምራን ከመ ይንብቡ ዘንተ መጽሐፈ ወያይድዑኒ ፍካሬሁ ወስእኑ ኣንብቦቶ ወፈክሮቶ ለዝገቱ መጽሐፍ።

Dan. 5:16 ወሰማዕኩ ኣነ በእንቲኣክ ከመ ትክል ኣንብቦ ወፈክሮ ወይእዜኒ እመ ክህልክ ኣንብቦቶ ወፈክሮቶ ለዝገቱ መጽሐፍ ወኣይዳዕከኒ ፍካሬሁ ሜላተ ኣለብሰክ ወአዐንቀክ ቃማ ወርቅ ውስተ ክሣድክ ወትኩንን ሣልስተ እደ መንግሥትየ።

- Dan. 5:17 ወይቤ ዳንኤል ቅድመ ንጉሥ ሀብትከሂ ለከ ይኩንከ ወፍተ መንግሥትከሂ ሀብ ለባዕድ ወኣነ ኣነብሶ ለዝንቱ መጽሐፍ ወእነግረከ ፍካሬሁ።
- Dan. 5:18 ኣ ንጉሥ እግዚአብሔር ልዑል ወሀቦ መንግሥተ ወክብረ ወዕቦ ወግርማ ለናቡከደነፆር ኣቡከ።
- Dan. 5:19 ወእምነ ዕብዩ ዘወሀቦ ኩሎሙ ኣሕዛብ ምድር ወበሓውርት ወሕዝብ ወይርዕዱ እምኔሁ ወይፈርሁ እምግርማሁ ወከመ እምቅድመ ገጹ ዘፈቀደ ይቀትል ወዘፈቀደ ይቀሥፍ ወዘፈቀደ ያክብር ወዘፈቀደ ያጎስር።
- Dan. 5:20 ወኣመ ኣዕቦዩ ልቦ ወኣጽንዐ ነፍሶ ከመ ይትዓቦይ ወድቀ እምዕቦዩ መንግሥቱ ውጎስረ እምክብሩ።
- Dan. 5:21 ወተሰደ እምሰብእ ወልቦ ኣርዌ ተውሀቦ ወነበረ ምስለ ኣራዊተ ገዳም ወምስለ ሐለስትዮታት ወተርዕዩ ሣዕረ ከመ ላሕም ወተሣረየ ነፍስቱ እምጠለ ሰማይ እስከ ኣእመረ ከመ ልዑል ይኳንን መንግሥተ ዕገላ እመሕያው ወለዘፈቀደ ይሁብ።
- Dan. 5:22 ወኣንተሂ ወልዱ ብልጣሶር ኢያትሐትከ ልቦከ ቅድመ እግዚአብሔር ወዘንተ ኩሎ ኢያእመርከ።
- Dan. 5:23 ወተዐበይከ ላዕለ እግዚአብሔር ኣምላክከ ኣምላክ ሰማይ ወምድር ወንዋዩ ቤቱ ኣምጸእከ ቅድሜከ ኣንተ ወመገብትከ ወኣንስቲያከ ወዕቀብቲከ ሰተይክሙ ቦቱ ወይነ ወኣማልክቲከ ዘወርቅ ወዘብሩር ወብርት ወዘጎጹን ዘዕፅ ወዘእብን እለ ኢይሬእዩ ወኢይሰምዑ ወኢየኣምሩ ኣእኩትከ ወለእግዚአብሔርሰ ዘውስተ እዴሁ መንፈስከ ወኩሎ ፍናዊከ ኢያእኩትከ።
- Dan. 5:24 ወበእንተ ዝ ፈነወ እምኅቤሁ ኣጽባዕተ እደ ሰብእ።
- Dan. 5:25 ዝኒ መጽሐፍ ዘተኣዘዘ ማኔ ቴቄል ፋሬስ።
- Dan. 5:26 ወከመ ዝ ፍካሬሁ ማኔ ብሂል ሰፈራ እግዚአብሔር ለመንግሥትከ ወሠለጣ።
- Dan. 5:27 ቴቄል ብሂል ደለዋ በመዳልው ወተረክበት ሕጽጽተ።
- Dan. 5:28 ፋሬስኒ ብሂል ተሰዕረት መንግሥትከ ወተውሀበት ለሜዶን ወለፋርስ።
- Dan. 5:29 ወኣዘዘ ብልጣሶር ያልብስዎ ሜላተ ለዳንኤል ወኣልበስዎ ወያዕንቅዎ ቃማ ወርቅ ዲቦ ክሣዱ ወይሰብኩ ሎቱ ከመ ይኩንን ሣልስተ እደ መንግሥቱ።
- Dan. 5:30 ወበይእቲ ሌሊት ሞተ ብልጣሶር ንጉሠ ከላውዴዎን።
- Dan. 5:31 ወዳርዮስ ሜዶናዊ ነግሠ ህየንቱሁ እንዘ ስላ ወክልኤቱ ክረምቱ።
- Dan. 6:1 ወኣደሞ በቅድሜሁ ለዳርዮስ ዳንኤል ወሄመ ዳርዮስ ንጉሥ በውስተ ኩሎ መንግሥቱ ምእተ ወዕሥራ መሳፍንተ ከመ የሀልዉ ውስተ ኩሎ መንግሥቱ።
- Dan. 6:2 ወእለ ይትሌዐሉ እምኔሆሙ ሠለስቱ ነገሥት ወኣሐዱ እምኔሆሙ ዳንኤል ከመ ያግብኡ ናሥታ ኅቤሁ ወኢያጽሕብዎ ለንጉሥ ወኢ በምንትኒ።
- Dan. 6:3 ወዳንኤል የዐቢ እምኔሆሙ እስመ ፈድፈደ መንፈስ ዘላዕሌሁ ወሄሞ ንጉሥ ላዕለ ኩሎ መንግሥቱ።
- Dan. 6:4 ወኅሠሁ ምክንያተ ሎቱ ለዳንኤል መገብት ወመኳንንት በዘያስተዋድይዎ ወኢረክቡ ምክንያተ ወኢ ኒጋየ ላዕሌሁ ወኢ ምንተኒ እስመ ምእመን ውእቱ።
- Dan. 6:5 ወይቤሉ መገብት ኢንረክብ ሎቱ ምክንያተ ለዳንኤል ዘእንበለ ሕገ ኣምላኩ።
- Dan. 6:6 ወእምዝ ተጋብኡ መገብት ወመኳንንት ኅብ ንጉሥ ወይቤልዎ ሕየው ንጉሥ ዳርዮስ ለዓለም።
- Dan. 6:7 ወተማከሩ ምክረ መላእክት ወመሳፍንት ወመገብት ወኩሎሙ እለ ውስተ መንግሥቱ ወኣደሙ ዕድሜ ከመ ኣልቦ ዘይስኢል ኅብ ኩሎ ኣማልክት ወሰብእ እስከ ሠለስቱ ዕለት ዘእንበለ ኅቤከ ንጉሥ ላዕለ ኩሎ መንግሥትከ ወእመ ኣኮ ይደይዎ ውስተ ግቦ ኣናብስት።
- Dan. 6:8 ወይእዜኒ ንጉሥ ኣዝዝ ዕድሜ ወጸሐፍ ከመ ኢይዕቦዩ ሥርዐተከ ፋርስ ወሜዶን።
- Dan. 6:9 ወሶቤሃ ኣዘዘ ንጉሥ ዳርዮስ ይጽሐፍ ዘንተ ሥርዐተ።
- Dan. 6:10 ወኣእሚሮ ዳንኤል ከመ ተኣዘዘ ዝንቱ ሥርዐት ቦኣ ቤቶ ወኣርኅወ መሳክወ ጽርሑ ኣንጻረ ኢየሩሳሌም ወጊዜ ሠለስቱ ሰዓት ዘዕለት ሰገደ ጸለየ ወተጋነየ እግዚአብሔር ኣምላኩ በከመ ይገብር ዘልፈ።
- Dan. 6:11 ወበኣይኒ ግብር ያስተዋድይዎ እሙንቱ ዕደው ዘልፈ ወረክብዎ ለዳንኤል እንዘ ያስተበቀሩ ለኣምላኩ ወይጹሊ።
- Dan. 6:12 ወሐሩ ወይቤልዎ ለንጉሥ ኣ ንጉሥ ኣኮኑ ኣንተ ኣደምከ ኢይስኣልከ ኩሎ ሰብእ ኅብ ኩሎ ኣማልክት ወሰብእ እስከ ሠለስቱ ዕለት ዘእንበለ ኅቤከ ንጉሥ ወእመ ቦ ዘተረክበ ይደይዎ ውስተ ግቦ ኣናብስት ወይቤ ንጉሥ እሙን ዝ ነገር ወኢይትነሠት ሥርዐተ ፋርስ ወሜዶን።
- Dan. 6:13 ወኣውሥኡ ወይቤሉ ቅድመ ንጉሥ ዳንኤል ዘእምደቂቀ ዔዋ ይሁዳ ኣቦዩ ወኢሰምዐ ትእዛዝከ ወበጊዜ ሠለስቱ ሰዓት ዘዕለት ሰኣለ ኅብ ኣምላኩ ስኢለተ።

- Dan. 6:14 ወሰሚያ ንጉሥ ዘንተ ነገረ ተከዘ ጥቀ ወተበአሰ ከመ ያድኅኖ ለዳንኤል እምነግህ እስከ ሠርክ ፈቀደ ያድኅኖ ወስእነ አድኅኖቶ።
- Dan. 6:15 ወይቤልዎ እሙንቱ ዕደው ሶቤሃ ለንጉሥ አእምር ንጉሥ ከመ ዕድሜ ዘአደሙ ፋርስ ወሜዶን ወሠርዑ አበየ ወሐሰወ ወኢሰአለ ኀቤከ።
- Dan. 6:16 ወእምዝ አዘዘ ንጉሥ ይጸውዕዎ ወያምጽእዎ ለዳንኤል ወይደይዎ ውስተ ግበ አናብስት ወሶበ ኮኖ በግብር ለንጉሥ ይቤሎ ንጉሥ ለዳንኤል አምላክከ ዘኪያሁ ታመልክ ዘልፈ ለያድኅነከ።
- Dan. 6:17 ወወረወዎ ወአምጽኡ እብነ ወከደኑ ዲበ አፈ ግብ ወጎተመ ንጉሥ በሕልቀቱ ወበሕልቀተ መገብቱ ከመ አልቦ ዘይትሜየን ላዕለ ዳንኤል።
- Dan. 6:18 ወአተወ ንጉሥ ቤቶ ወኖመ ዘእንበለ ይደረር ወኢያብኡ ሎቱ ዘይበልዕ ወአበዮ ንዋም ወዐጸወ እግዚአብሔር አፈ አናብስት ወኢሰሐጥዎ ለዳንኤል።
- Dan. 6:19 ወእምዝ ጌሠ ንጉሥ በጽባሕ ቅድመ ጎሕ ወሮጸ ኀበ ግበ አናብስት።
- Dan. 6:20 ወበጸሒ ኀበ ግብ ከልሐ በዐቢይ ቃል ወይቤ ዳንኤል ዳንኤል ገብረ እግዚአብሔር ሕያው አምላክከ ዘኪያሁ ታመልክ ዘልፈ ክህለኑ አድኅኖተከ እምአፈ አናብስት።
- Dan. 6:21 ወይቤሎ ዳንኤል ለንጉሥ ኦ ንጉሥ ለዓለም ሕየው።
- Dan. 6:22 አምላኪየ ፈነወ መልአኮ ወአድኅነኒ ወፈጸመ አፈ አናብስት ወኢሰሐጡኒ ወኢክህለኒ እስመ ተረክበ ሊተ ጽድቅ በቅድሜሁ ወቅድሜከ ንጉሥ ኢገበርኩ እኩየ።
- Dan. 6:23 ወሶቤሃ ተፈሥሐ ንጉሥ ጥቀ በእንቲአሁ ወአዘዘ ያውፅእዎ ለዳንኤል እምግበ አናብስት ወወፅአ ዳንኤል እምግብ አናብስት ወኢተክክየ ምንትኒ ወኢተረክበ ሕሡም በላዕሌሁ እስመ ተአመነ በአምላኩ።
- Dan. 6:24 ወይቤ ንጉሥ ያምጽእዎሙ ለእሙንቱ ዕደው እለ አስተዋደይዎ ለዳንኤል ወአምጽእዎሙ ወወደይዎሙ ውስተ ግበ አናብስት ለእሙንቱ ወለደቂቆሙ ወለአንስቲያሆሙ ወዘእንበለ ይብጽሑ ምድረ ግብ አኀዝዎሙ አናብስት ወቀጥቀጥዎሙ ኩሎ አዕፅምቲሆሙ።
- Dan. 6:25 ወእምዝ ጸሐፈ ዳርዮስ ንጉሥ ለኩሎ አሕዛብ ወነገድ ወበሓውርት ወለኩሎሙ እለ ይነብሩ ውስተ ኩሎ ምድር እንዘ ይብል ሰላም ይብዛኅ ለክሙ እምቅድመ ገጽየ።
- Dan. 6:26 አዘዝኩ ሥርዐተ ለኩሎ መኳንንት ዘውስተ መንግሥትየ ከመ ይፍርሁ ወይርዐዱ እምቅድመ ገጸ አምላክ ዳንኤል እስመ ውእቱ አምላክ ሕያው ዘይሄሉ ለዓለም ወዘኢይማስን መንግሥቱ ወምኩናኑኒ ለዝሉፉ።
- Dan. 6:27 ያድኅነኒ ወይረድእኒ ወይገብር ተአምረ ወመንክረ በሰማይ በላዕሉ ወበምድር በታሕቱ ዘአድኅኖ ለዳንኤል እምአፈ አናብስት።
- Dan. 6:28 ወዐብየ ዳንኤል በመንግሥተ ዳርዮስ ሜዶናዊ ወበመንግሥተ ቂሮስ ፋርሳዊ።
- Dan. 7:1 በቀዳማዊ ዓመተ መንግሥቱ ለብልጣሶር ንጉሠ ከላውዴዎን ሐለመ ዳንኤል ሕልመ ወርእየ ርእሶ በውስተ ምስካቢሁ ወጸሐፈ ሕልሞ።
- Dan. 7:2 ወይቤ አነ ዳንኤል ሐለምኩ ሕልመ ወርኢኩ አርባዕተ ነፋሳተ ሰማይ ይነፍሱ ውስተ ባሕር ዐቢይ።
- Dan. 7:3 ወዐርጉ አርባዕቱ አራዊት እምነ ባሕር ኀቡር ወፍሉጣን አሐዱ እምካልኡ።
- Dan. 7:4 ወቀዳማዊት ከመ አንበሳዊት ወባቲ ክንፍ ወክነፊሃኒ ከመ ዘንስር ወርኢክዋ እስከ ተመልኅ ክነፊሃ ወተንሥኦት እምድር ወቆመት በእግረ ሰብእ ወልበ ሰብእ ተውህበ ላቲ።
- Dan. 7:5 ወመጽኦት ካልእት አርቄ ወትመስል ድበ ወቆመት ወአሐቲ ገጸ ወሠለስቱ ዐፅመ ገበዋት ውስተ አፋሃ ማእከለ አስናኒሃ ወከመ ዝ እቤላ ተንሥኢ ወብልዲ ሥጋ ብዙኀ።
- Dan. 7:6 ወእምድኅረ ዝንቱ ርኢኩ ካልእ አርቄ ግሩመ ወመደንግፀ ከመ ነምር ወላዕሌሁ አርባዕቱ ክንፈ ያፍ ወአርባዕቱ አርእስቲሁ ለአርቄ ወተውህበ ሎቱ መባሕት።
- Dan. 7:7 ወእምድኅረሁ ርኢኩ ራብዕ አርቄ ግሩመ ወመደንግፀ ወጎያለ ጥቀ ወስነኒሁ ዘኀጺን ወጽፈሪሁ ዘብርት ይበልዕ ወየሐርጽ ወዘተርፈኒ ይከይድ በእግሩ ወውእቱ አርቄ የዐቢ እምኩሎሙ አራዊት ዘቅድሜሁ ወወሠርቱ አቅርንቲሁ።
- Dan. 7:8 ወነጸርኩ አቅርንቲሁ ወናሁ ካልእ ቀርን ንኡስ በቂለ በማእከሎሙ ወሠለስቱ አቅርንቲሁ እለ ቅድሜሁ ተመልኅ እምቅድመ ገጹ ወቦቱ አዕይንት ከመ አዕይንተ ሰብእ ወለውእቱ ቀርን ንኡስ ወአፋሁ ይነብብ ዐቢያተ።
- Dan. 7:9 ወርኢኩ እስከ አንበሩ መናብርተ ወነበረ ብሉየ መዋዕል ወልብሱ ጸዐዳ ከመ በረድ ወሥዕርተ ርእሱ ከመ ፀምር ወመንበሩኒ እሳት ዘይነድድ ወሠረገላቲሁኒ አፍሓም ዘያንበለብል።

Dan. 7:10 ወፈለገ እሳት ይውሕዝ ቅድሜሁ አእላፍ አእላፋት ይትለአክዎ ወትእልፊተ አእላፋት ይቀውሙ ቅድሜሁ ወነበረ ዐውደ ወከሠተ መጻሕፍተ።

Dan. 7:11 ወርኢኩ ሶቤሃ እምቃለ ነገሩ ዐቢይ ዘይነብብ ዝኩ ቀርን እስከ ተአተተ ወእስከ ተቀትለ ውእቱ አርዌ ወጠፍአ ወወሀቡ ሥጋሁ ያውዕዩ በእሳት።

Dan. 7:12 ወቆመ ርእሶሙ ለእልክቱ አራዊት ወተውህበ ሎሙ ነዋኅ ሕይወት እስከ ዕድሜሆሙ።

Dan. 7:13 ወርኢኩ በራእየ ሌሊት ወናሁ መጽአ ዐቢይ ደመና ሰማይ ከመ ወልደ ዕጓለ እመ ሕያው ወበጽሐ ኀበ ብሉየ መዋዕል።

Dan. 7:14 ወተውህበ ሎቱ ምክኖን ዘለዓለም ወክብር ወመንግሥት ወሥልጣን ወክሎሙ አሕዛብ ወሕዝብ ወበሓውርት ወነገድ ወነገሥት ይትቀነዩ ሎቱ ወምክኖኑኒ ምክኖን ዘለዓለም ወመንግሥቱ ዘኢየሳልቅ ወኢይማስን።

Dan. 7:15 ወርዕደኒ መንፈስየ አነ ዳንኤል ወደንገፀኒ ልብየ እምራእየ ርእስየ።

Dan. 7:16 ወሐርኩ ወጠየቅዎ ለአሐዱ እምእለ ይቀውሙ ወነገረኒ ወአይድዐኒ ፍካሬሁ ጥዩቀ ወጠየቁ ኩሎ ነገሮ።

Dan. 7:17 ወይቤለኒ እሉ አርባዕቱ አራዊት ዐበይት ዘርኢኩ አርባዕቱ ነገሥት እሙንቱ ወይትነሥኡ ዲበ ምድር ወዓዲ ይትአተቱ።

Dan. 7:18 ወይገብእ መንግሥት ለቅዱሳን ልዑል ወይነብርዋ ለዓለመ ዓለም።

Dan. 7:19 ወጠየቅዎ ካዕበ በእንተ ራብዓይ አርዌ እስመ ነኪር ውእቱ እምክሉ አራዊት ወግሩም ውእቱ ጥቀ ወስነኒሁ ዘኅጺን ወጽፈሪሁ ዘብርት ይበልዕ ወየሐርጽ ወዘተርፈ ይከይድ በእግሩ።

Dan. 7:20 ወበእንተ እልክቱ ዐሠርቱ አቅርንቲሁ ዘውስተ ርእሱ ዘበቄለ ወዝኩሂ ካልእ ቀርን ንኡስ ዘበቄለ ማእከሎሙ ወመልኖሙ ለሠለስቱ እምእልክቱ ዐሠርቱ አቅርንት እለ እምቅድሜሁ ወዝኩ ዘበ አዕይንት ወአፉሁ ይነብብ ዐቢያተ ወርእሱ የዐቢ እምአብያጺሁ።

Dan. 7:21 ወርኢክዎ ለውእቱ ቀርን ይትቃተሎሙ ለቅዱሳን።

Dan. 7:22 ወሞአሙ እስከ መጽአ ብሉየ መዋዕል ኀቤሆሙ ወፈትሐ ሎሙ ልዑል ለቅዱሳኒሁ ወበጽሐ ዕድሜሁ ወአጽንዐ መንግሥቶሙ ለቅዱሳን።

Dan. 7:23 ወይቤለኒ ዝኩ አርዌ ራብዕ ራብዕት መንግሥት ይእቲ እንተ ትትነሣእ ውስተ ምድር ወእንተ ተዐቢ እምክሉሙ መንግሥታተ ምድር ወትበልዓ ኩላ ምድር ወይከይዳ ወትቀጥቅጣ።

Dan. 7:24 ወዐሠርቱ አቅርንት ዐሠርቱ ነገሥት እሙንቱ ዘይትነሥኡ ዲበ ምድር ወእምድኅሬሆሙ ይትነሣእ ካልእ ንጉሥ ወያኣትቶሙ ለሠለስቱ እኩያን እለ እምቅድሜሁ ወያኅስሮሙ ለዐሠርቱ ነገሥት።

Dan. 7:25 ወይነብብ በነገረ ልዑል ወያኣትቶሙ ለቅዱሳን ልዑል ወይኄይል ወይዌልጥ መዋዕል ወሕገ ወይትወሀብ ሎቱ እስከ ዕድሜሁ ውስተ እዴሁ ዓመት ወዓመታት ወመንፈቀ ዓመት።

Dan. 7:26 ወይነብር ዐውደ ወይስዐሮ ለመልአክ ከመ ያማስን ለግሙራ ወመንግሥተ ወምክኖን።

Dan. 7:27 ወዕባየ መንግሥት ዘመትሕተ ሰማይ ይትወሀብ ለቅዱሳን ልዑል መንግሥቱኒ መንግሥት ዘለዓለመ ዓለም ወክሎሙ መኳንንት ይትቀነዩ ሎቱ ወይትኤዘዙ ሎቱ እስከ ዝየ።

Dan. 7:28 ወአሜሁ ይከውን ማኅለቅተ ሕዝብ ወአነ ዳንኤል ተሀውከኒ ኀሊናየ ጥቀ በሕቁ ወተወለጠ ራእይየ ወዐቀብኩ ነገሮሙ ውስተ ልብየ።

Dan. 8:1 አመ ዐሠርቱ ወሠለስቱ ዓመተ መንግሥቱ ለብልጣሶር ንጉሥ አስተርአየኒ ራእይ ወአነ ዳንኤል ርኢኩ እምድኅረ አስተርአየኒ ዘቀዳሚ።

Dan. 8:2 ወርኢኩ በራእይ ወአነ እንዘ ሀሎኩ ውስተ ሱሳ ዘባሪ እንተ ብሔረ ኤላም ወሀሎኩ ውስተ ኡባል።

Dan. 8:3 ወአንሣእኩ አዕይንትየ ወርኢኩ ወናሁ መጽአ አሐዱ በሐክ ወቆመ ቅድመ ኡባል ወቦቱ ክልኤቱ አቅርንት ወነዋኃን አቅርንቲሁ ወአሐዱ ይነውኅ እምካልኡ ወዘይነውኅ ድኅረ በቄለ።

Dan. 8:4 ወርኢክዎ ለውእቱ በሐክ ይወግእ በአቅርንቲሁ ለመንገለ ባሕር ወሰሜን ወደቡብ ወኢይቀውሙ ክሎሙ አራዊት ቅድሜሁ ወአልቦ ዘያመሥጥ እምእዴሁ ወገብረ በከመ ፈቀደ ዐቢየ።

Dan. 8:5 ወአነ ዳንኤል ሀሎኩ ውስተ ሱሳ ዘባሪ ወእንዘ እኄሊ ዘንተ ናሁ መጽአ አሐዱ ዳቤላ ዘጠሊ እምደቡብ ላዕለ ኩሉ ገጸ ምድር ወአልቦ ዘለከፋ ለምድር ወቦ ቀርን ማእከለ አቅርንቲሁ።

Dan. 8:6 ወውእቱ ዳቤላ ዘጠሊ ሐረ ኀበ ዝኩ በሐክ ዘቦ አቅርንት ዘርኢኩ ይቀውም ቅድመ ኡባል ወርጸ ኀቤሁ በኀይል።

Dan. 8:7 ወርኢክዎ ወበጽሐ ኀበ ዝኩ በሐኩ ወኣብደ ወተኣርወየ ላዕሌሁ ወአውደቆ ለዝኩ በሐኩ ወቀጥቀጥን ክልኤሆን አቅርንቲሁ ወአልቦ ኀይለ ለዝኩ በሐኩ ከመ ይቁም ቅድሜሁ ወነጽሐ ውስተ ምድር ወኬዶ ወአልቦ ዘያድኅኖ እምእዴሁ ለውእቱ በሐኩ።

Dan. 8:8 ወዝኩ ዳቤላ ዘጠሊ ዐቢየ ጥቀ ወሶበ ሰበሮ ወቀተሎ ለዝኩ ቀርኖ ወዐቢየ ዳቤላ ጠሊ ወዓዲ በቈለ አርባዕቱ አቅርንቲሁ መትሕቲሁ ዲበ አርባዕቱ ነፋሳተ ሰማይ።

Dan. 8:9 ወእምውስተ አሐዱ እምኔሆሙ በቈለ አሐዱ ቀርን ጽኑዐ ወዐቢየ ጥቀ ለመንገለ ሰሜን ወጽባሕ።

Dan. 8:10 ወበጽሐ በኀይለ ዐቢይ እስከ ኀይለ ሰማይ ወወድቀ ውስተ ምድር እምነ ኀይለ ሰማይት ወእምነ ከዋክብተ ሰማይ ወኬዳ እስከ ማእከላ።

Dan. 8:11 ወሠርዌ ዐብየ ከመ ያድኅን ጌዋሁ ወቦቱ ይትሀወኩ ሠዋዕት ወኮነ ወተሰልጠ ወማሰነ መቅደስ።

Dan. 8:12 ወተውህበ ላዕለ መሥዋዕተ ኀጢአት ወተገድፈት ውስተ ምድር ወገብረ ወተሰልጠ።

Dan. 8:13 ወሰማዕኩ አሐዱ እምቅዱሳን ዘይነግር ወይቤ ፊልሙንጢ ይነብብ እስከ ማእከኑ ይቀውም ዝ ራእየ ነቢያት ወመሥዋዕት እንተ ተነሥተት ወኀጢአት እንተ አማሰነት ወተውህበት መቅደስ ወኀይለ ተከይደ።

Dan. 8:14 ወይቤሎ እምነግህ እስከ ሠርክ ወዐሠርተ ምእተ ወሠለስተ ምእት መዋዕለ ይነጽሕ መቅደስ።

Dan. 8:15 ወእምዝ ሶበ ርኢኩ አነ ዳንኤል ዘራእየ ወኀሥሥኩ ፍካሬሁ መጽአ ወቆመ ቅድሜየ ከመ ራእየ ብእሲ።

Dan. 8:16 ወሰማዕኩ ቃለ ብእሲ በማእከለ ኡባል ወጸውዐ በዐቢይ ቃል ወይቤ ገብርኤል አለብዎ ዝኩ ራእየ።

Dan. 8:17 መጽአ ወቆመ ጥቃ ኀበ እቀውም አነ ወመጺኦ ደንገፅኩ ወወደቁ በገጽየ ወይቤለኒ ለበውከኑ ወልደ ዕገለ ዓዲሂ ኢኀልቀ ዕድሜሁ ለዝ ራእይ።

Dan. 8:18 ወሶበ ነበበኒ ደንገፅኩ ወወደቁ በገጽየ ውስተ ምድር ወኣኀዘኒ ወኣንሥኣኒ ወኣቀመኒ በእግርየ።

Dan. 8:19 ወይቤለኒ ናሁ አነ እነግረክ ዘይከውን በደኃሪ መዋዕል መቅሠፍተ ዐቢየ እስመ ዓዲ ማኅለቅት ዕድሜሁ ለዝ ራእይ ኢበጽሐ።

Dan. 8:20 በሐኩ ዘርኢክ ወዘቦ አቅርንት ንጉሠ ፋርስ ወሜዶን ውእቱ።

Dan. 8:21 ወዳቤላ ዘጠሊ ንጉሠ ዮናናውያን ውእቱ ወቀርኑኒ ዘየዐቢ በማእከለ አቅርንቲሁ ውእቱ ንጉሥ ቀዳማዊ ወተቀጥቀጠ በኀበ ቆሙ።

Dan. 8:22 ወአርባዕቱ አቅርንት ታሕቲሁ ዘበቈሉ አርባዕቱ ነገሥት ይትነሥኡ ወኣኮ በኀይሎሙ።

Dan. 8:23 ወበደኃሪታ መንግሥቶሙ ትትቀጠቀጥ ወይትፌጸም ኀጢአቶሙ እምውስቲቶሙ አሐዱ ይትነሣእ ንጉሥ ዘኢየሳፍር ገጸ ወኢየአምር ምሳሌ።

Dan. 8:24 ወጽኑዕ ኀይሎ ወያማስን ዕጹባተ ወይገብር ወያጠፍአሙ ለጽኑዓን ወለቅዱሳን ሕዝብ።

Dan. 8:25 ወያረትዕ አርዑተ ክሣድ ወትምይንት ውስተ እዴሁ ወይትዔበይ በልቡ ወበጉሕሉቱ ያኀልቆሙ ለብዙኃን ወዲበ መልአክ መላእክት ያቀውም መልአክ ወዘእንበለ እድ ይቀጠቀጥ።

Dan. 8:26 ወራእየ ሠርክ ወነግህ ዘተብህለ እሙን ውእቱ ወኣንተሰ ዳንኤል ኀትሞ ለዝ ራእይ ለብዙኀ መዋዕል።

Dan. 8:27 ወኣነ ዳንኤል ወደይኩ ወሰከብኩ መዋዕለ ወተንሣእኩ ወገበርኩ ግብረ ንጉሥ ወኣንከርኩ ዘንተ ራእየ ወአልቦ ዘየአምሮ።

Dan. 9:1 በቀዳሚ ዓመተ መንግሥቱ ለዳርዮስ ወልደ ሱኤር አህሻዊሮስ ዘእምዘርዐ ሜዶን ዘነግሠ ላዕለ መንግሥተ ከላውዴዎን።

Dan. 9:2 በዓመት አሐዱ ዘመንግሥቱ አነ ዳንኤል አእመርኩ እምውስተ መጻሕፍት ኅልቄ ዓመታት ዘኮነ ኀበ ኤርምያስ ነቢይ ቃለ እግዚአብሔር በዘይሄለጥ ሙስናሃ ለኢየሩሳሌም ሰብዓ ዓመት።

Dan. 9:3 ወሜጥኩ ገጽየ ኀበ እግዚአብሔር አምላኪየ ከመ እኅሥሥ ምሕረተ ወሣህለ በጸም ወበሠርቅ ወበሐመድ።

Dan. 9:4 ወጸለይኩ ኀበ እግዚአብሔር ወገነይኩ ሎቱ ወእቤ እግዚአ አምላክ ዐቢይ ወስቡሕ ዘተዐቅበ ኪዳነክ ወምሕረተክ ለእለ ያፈቅሩክ ወለእለ የዐቅቡ ትእዛዘክ።

Dan. 9:5 አበስነ ወዐመፅነ ወጊገይነ ወዐለውነ ወተግሕሥነ እምትእዛዝክ ወእምፍትሕክ።

Dan. 9:6 ወኢሰማዕናሆሙ ለነቢያት አግብርቲክ እለ ነገርዎሙ በስምክ ለነገሥትነ ወለመኳንንቲነ ወመልአክቲነ ወለአበዊነ ወለኩሎሙ አሕዛበ ምድር።

- Dan. 9:7 ወለከ እግዚአብሔር ጽድቅ ወለነ ኅፍረት ለገጽን በዛቲ ዕለት ለሰብአ ይሁዳ ወለእለ ይነብሩ ኢየሩሳሌም ወለኩሎም እስራኤል ለርሑቃን ወለቅሩባን በኩሉ ምድር ኅብ ዘረውኑሙ ህየ ማዕሌቶሙ ዘዐለውከ።
- Dan. 9:8 እግዚአብሔር ለነ ኅፍረት ለገጽን ወለነገሥትነ ወለመላእክቲነ ወለመኳንንቲነ ወለአበዊነ እስመ አበስነ ለከ።
- Dan. 9:9 እግዚአብሔር አምላክ ሣህል ወምሕረት እስመ ክሕድነ ወኢሰማዕነ ቃለ እግዚአብሔር አምላክነ።
- Dan. 9:10 ከመ ንሑር በሕግ ዘወሀበነ በቅድመ ገጽን በእደ አግብርቲሁ ነቢያት።
- Dan. 9:11 ወኩሎም እስራኤል ዐለዉ ሕገከ ወአበዩ ሰሚዐ ቃልከ ወመጽአ መርገም ላዕሌነ ወመሐላ ዘጽሑፍ ውስተ ኦሪተ ሙሴ ገብረ እግዚአብሔር እስመ አበስነ ሎቱ።
- Dan. 9:12 ወአቀመ ቃሉ ዘነበበ ላዕሌነ ወዲበ መኳንንቲነ እለ ተኩነኩነ ወአምጽአ ላዕሌነ እኪተ ዐቢየ ዘኢኮነ ከማሁ በኩሉ መትሕተ ሰማይ ዘከመ ኮነ በኢየሩሳሌም።
- Dan. 9:13 በከመ ጽሑፍ ውስተ ኦሪተ ሙሴ ወዘንቱ እኩይ በጽሐነ ወኢተማሕለልነ ለገጸ እግዚአብሔር አምላክነ ከመ ንትመየጥ እምኅጢአትነ ወነኅሊ ኩሎ ጽድቅ።
- Dan. 9:14 ወተግሀ እግዚአብሔር ወአምጽአ መቅሠፍተ ዐቢየ እስመ ጻድቅ እግዚአብሔር አምላክነ በኩሉ ግብሩ ዘገብረ ላዕሌነ ወኢሰማዕነ ቃሉ።
- Dan. 9:15 ወይእዜሂ እግዚአብሔር አምላክነ ዘአውግእኩሙ እምድረ ግብጽ ለሕዝብከ በእደ ጽንዕት ወበመዝራዕት ልዕልት ወገበርከ ለከ ስምዐ እስከ ዛቲ ዕለት አበስነ ወጌገይነ።
- Dan. 9:16 እግዚአብሔር በኩሉ ምሕረትከ ሚጥ መዓተከ ወመቅሠፍትከ እምኔነ ወእምሀገርከ ኢየሩሳሌም ወእምደብረ መቅደስከ እስመ አበስነ ወጌጋይነ ወአበዊነ በኢየሩሳሌም ወሕዝብከ ኅስሩ በኅብ ኩሎ አድያሚነ።
- Dan. 9:17 ወይእዜሂ ስማዕ እግዚአብሔር አምላክነ ጸሎተ ገብርከ ወስእለቶ ወኣብርህ ገጸከ ላዕለ መቅደስከ ዘኢየሩሳሌም ዘመዝበረ በእንቲአከ።
- Dan. 9:18 እግዚአብሔር አምላክነ ወስማዕ ጸሎትየ ወክሥት አዕይንቲከ ወርኢ ሙስናነ ወዘሀገርከ እንተ ተሰምየ ስምከ በላዕሌሃ ወአኮ በጽድቅነ ዘንዌሩ ሣህለነ ቅድሚከ ዳእሙ በምሕረትከ ብዙኅ እግዚአብሔር።
- Dan. 9:19 እግዚአብሔር ስምዐነ እግዚአብሔር ተሣህለነ እግዚአብሔር ግበር ወኢታጐንዲ በእንቲአከ እግዚአብሔር አምላክነ እስመ ተሰምየ ስምከ በላዕሌነ ወላዕለ ሀገርከ ኢየሩሳሌም ወዲበ ሕዝብከ።
- Dan. 9:20 ወእንዝ እነግር ዘንተ ወእጼሊ ወእትነሐይ ወኅጢአትየ ወኅጢአተ ሕዝብየ እስራኤል ወእገድፍ ሣህልየ ኅብ እግዚአብሔር አምላክነ ወበእንተ ቤተ መቅደሱ ለአምላኪየ።
- Dan. 9:21 ወእንዝ እነግር ጸሎትየ መጽአ ብእሲ ገብርኤል ዘርኢኩ በራእይ ቀዲሙ ይሰርር ወገሰሰኒ በጊዜ መሥዋዕተ ሠርክ።
- Dan. 9:22 ወአለበወኒ ወተናገረ ምስሌየ ወይቤለኒ ገብርኤል ይእዜ መጻእኩ አለቡከ ጥበበ።
- Dan. 9:23 ወበቀዳሚ ጸሎትከ ወፅእ ቃል ወመጻእኩ አለቡከ ወእዜኩከ ዘትፈቱ እስመ ብእሴ ፍትወት አንተ ኅልዮ ለነገርከ ወለቡ ዘርኢከ።
- Dan. 9:24 ስማዕ ሰንበታተ አድሞሙ ለሕዝብከ ወለሀገርከ ቅድስት ከመ ትሰለጥ ኅጢአት ወይትኅተም ጌጋይ ወይደምስስ አበሳ ወትሰዓር ዐመፃ ወትምጻእ ጽድቅ እንተ ለዓለም ወይትዐተብ ራእየ ነቢያት ወይትቀባዕ ቅዱስ ቅዱሳን።
- Dan. 9:25 ወአእምር ወለቡ እምፀአተ ቃሉ ዘአወሥክከ ወትትሐነጽ ኢየሩሳሌም እስከ ክርስቶስ ንጉሥ ሰብዐ ሰንበታት ስሳ ወክልኤተ ሰንበታተ ይትመየጥ ወይትሐነጽ መርሕባ ወዐፍረታ ወይከውን መዋዕል ፍሥሓ።
- Dan. 9:26 እምድኅረ ስሳ ወክልኤቱ ሰንበታት ይጠፍእ ቅብዐት ወፍትሕ አልበ በኅቤሁ ወያማስን ሀገረ ወመቅደስ ምስለ ንጉሥ በይመጽእ ይትመተሩ በማየ አይኅ እስከ ለዝሉፉ ይትራገዙ ወይትቃተሉ እስከ ይጠፍኡ።
- Dan. 9:27 ወይማስን መኣዝኒሁ ለግሙራ ወፍጡነ ይማስን ወያጸንዕ ሥርዐቶሙ ለቅድስና አሐቲ ሰንበተ ወመንፈቀ ሰንበት ወይሰዐር መሥዋዕት ወሞጻሕት ወይማስን ርኩሶሙ ዘውስተ መቅደሱ ወእስከ ማኅለቅተ ዓመታት ይትወሀብ ዕድሜሁ ለሙስና።
- Dan. 10:1 በሣልስ ዓመት መንግሥቱ ለቂሮስ ንጉሠ ፋርስ ተከሥተ ሎቱ ቃለ እግዚአብሔር ለዳንኤል ወተሰምየ ስሙ ብልጣሶር እሙን ነገሩ ወኅይል ዐቢይ ወልቡና ተውህበ ሎቱ በውስተ ራእይ።
- Dan. 10:2 ወውእተ አሚረ አነ ዳንኤል ሀሎኩ እንዝ እላሑ ሠለስተ ሰንበታተ መዋዕለ ወኢፈተውኩ እብላዕ እክለ ወኢቦአ ውስተ አፋየ ሥጋ ወወይን።
- Dan. 10:3 ወቅብዐ ኢተቀባዕኩ እስከ ይትፌጸመ ሠለስቱ ሰንበታተ መዋዕል።

Dan. 10:4 ወኮነ አመ ዐሠርቱ ወሰመንቱ ዓመት በዕሥራ ወአሐዱ ጽባሕ በረቡዕ ሠርቀ ወርኅ ቀዳሚ ወሀሎኩ ኣነ ዳንኤል ውስተ ፈለግ ዐቢይ ዘውእቱ ጤግሮስ።

Dan. 10:5 ወአንሣእኩ አዕይንትየ ወነጸርኩ ወርኢኩ ናሁ አሐዱ ብእሲ ዘይለብስ ጠብደነ ወቅኑት ሐቋሁ በወርቀ አፌዝ።

Dan. 10:6 ወነፍስቱሂ ከመ ተርሴስ ወገጹሂ ከመ ራእየ መብረቅ ወአዕይንቲሁኒ ከመ መኃትወ እሳት እደዊሁ ወእገረሁ ከመ ብርት ርሱን ወቃለ ነገሩ ከመ ድምፀ አሕዛብ ብዙኅ።

Dan. 10:7 ወርኢኩ ኣነ ዳንኤል ባሕቲትየ ዘራእየ ወዕደው እለ ምስሌየ ኢርእዩ ዘንተ ራእየ ዳእሙ ዐቢይ ረዓድ ወድንጋዒ አኅዞሙ ወእምፍርሀት ጐዩ።

Dan. 10:8 ወአነ ባሕቲትየ ተረፍኩ ወርኢኩ ዘራእየ ዐቢየ ወኢተርፈ ላዕሌየ ኅይልየ ወክብርየ ተወለጠ ወኢአኅዝኩ ኅይለ።

Dan. 10:9 ወሰማዕኩ ቃለ ነገሩ ወሰሚዕየ ቃለ ነገሩ ደንገፅኩ ወወደቁ ውስተ ምድር በገጽየ።

Dan. 10:10 ወናሁ እድ አኅዘኒ በእራኅተ እደውየ ወአቀመኒ በብረክየ።

Dan. 10:11 ወይቤለኒ ዳንኤል ዳንኤል ብእሴ ፍትወት አንተ ወለቡ ዘነገረ ዘነገርኩክ ኣነ ወቁም በእግርክ ወበኅይልክ እስመ ይእዜ ተፈኖኩ ኅቤክ ወሶበ ይቤለኒ ዘነገረ ተንሣእኩ እርዕድ።

Dan. 10:12 ወይቤለኒ ኢትፍራህ ዳንኤል እስመ እምቀዳሚት ዕለት ዘአግባእክ ልበክ ኅበ እግዚአብሔር ከመ ትሠራሕ ወትለቡ ለገጽ አምላክክ ተሰምዐ ነገርክ ወአነ መጻእኩ በእንተ ቃልክ።

Dan. 10:13 ወመልአክ ንጉሠ ፋርስ ይቀውም ይቀውም ቅድሜየ ወዕሥራ ወአሐደ ዕለት ወናሁ ሚካኤል አሐዱ እመላእክት ቀደምት መጽአ ይርድአኒ ወኪያሁ ኅደጉ ህየ ምስለ መልአክ ንጉሠ ፋርስ።

Dan. 10:14 ወይቤለኒ መጻእኩ እንግርክ ዘይረክበሙ ለሕዝብክ በደኃሪ መዋዕል እስመ ርእይ ዓዲ በዕድሜሁ ወእቤ ንግረኒ እግዚአ።

Dan. 10:15 ወሶበ ነገረኒ ዘነገረ ሜጥኩ ገጽየ ውስተ ምድር ወደንገፅኩ ወብህምኩ።

Dan. 10:16 ወናሁ ከመ አምሳለ ወልደ ዕጓለ እመ ሕያው ወገሰሰኒ ከናፍርየ ወከሠትኩ አፉየ ወነበብኩ ወእቤሎ ለዘይቀውም ቅድሜየ እግዚእየ እምነ ግርማክ ተሀውከት ወተመስወት ነፍስየ በላዕሌየ ውግላእኩ ኅይለ።

Dan. 10:17 ወእፎ ይክል ገብርክ እግዚአ ተናግሮ ምስለ እግዚእየ ዘንተ ወአነሂ እምይእዜ ኢይቀውም ኅይልየ ወኢተርፈ እምነ መንፈስየ።

Dan. 10:18 ወደገመ ገሰሰኒ ከመ ራእየ ብእሲ ወአጽንዐኒ።

Dan. 10:19 ወይቤለኒ ኢትፍራህ እስመ ብእሴ ፍትወት አንተ ሰላም ብክ ጽናዕ ውጎይል ወተዐገሥ ወእንዝ ይትናገረኒ ጸናዕኩ ወእቤሎ ንግረኒ እግዚአ እስመ አጽናዕከኒ።

Dan. 10:20 ወይቤለኒ ሶበሰ ተአምር ለምንት መጻእኩ ኅቤክ ወይእዜኒ እትመየጥ ከመ እጽብኦ ለመልአክ ንጉሠ ፋርስ ወእንዝ እወፅእ ኣነ ናሁ መጽአ መልአክ ዮናናውያን።

Dan. 10:21 ወአዘዘኒ ትእዛዘ ዘዜነዎ በመጽሐፈ ጽድቅ ወአልቦ መኑሂ ዘዐብየኒ በዝንቱ ዳእሙ ሚካኤል መልአክክሙ።

Dan. 11:1 ወአመ በዓመት ቀዳሚ ዘዳርዮስ ሜዶናዊ ቆምኩ ለአኅይሎቱ ወለረድኤቱ።

Dan. 11:2 ወይእዜሂ ጽድቀ እነግረክ ናሁ እንከ ሠለስቱ ነገሥት ይትነሥኡ ውስተ ፋሬስ ወራብዎሙስ ይብዕል ዐቢየ ብዕለ እምኩሉ ወበአጽንዖቱ ብዕሉ ያስተናሥኦሙ ለኩሎሙ ነገሥተ ኤዶማውያን።

Dan. 11:3 ወይትነሣእ ኅያል ንጉሥ ወይኳንን ምኩናነ ብዙኅ ወይገብር ዘፈቀደ።

Dan. 11:4 ወተንሥኦ መንግሥቱ ትትቀጠቀጥ ወትዘር ውስተ አርባዕቱ ነፋሳተ ሰማይ ወኢ በደኃሪቱ ወኢ በከመ ምኩናኑ አልቦ ዘኩነነ እስመ ትትመላኅ መንግሥቱ ወለባዕዳን ትትወሀብ።

Dan. 11:5 ወእምእሉ ይጸንዕ ንጉሠ አዜብ ወአሐዱ እመላእክቲሁ ይጸንዕ ላዕሌሁ ወይኳንን ምኩናነ ብዙኅ።

Dan. 11:6 ወእምድኅረ ብዙኅ ዓመታት ይዴመሩ ውስተ ንጉሠ አዜብ ትበውእ ኅበ ንግሠ መስዕ ከመ ትግበር ቀተተ ምስሌሁ ወኢይጸንዕ ኅይለ መዝራዕታ ወኢይቀውም ዘርዑ ወይትወሀብ ላቲ ወእለሂ ያመጽእዋ ለወለተ ንጉሠ አዜብ ወዘያጸንዓሂ በመዋዕል።

Dan. 11:7 ወይቀውም እምጉንዳ ሥርዋ ጽኑዕ ወይመጽእ ኅበ ኅይል ወይበውእ ኅበ አዜብ ኅበ ንጉሠ መስዕ ወይገብር ቦሙ ወያጸንዕ አምላኩሙኒ።

Dan. 11:8 ወይገፈትዎሙ ምስለ አማልክቲሆሙ ወምስለ መላእክቲሆሙ ወምስለ መኳንንቲሆሙ ወምስለ ኩሎ መፍትው ወርቆሙ ወብሩሮሙ በዒዋ ወይወስድ ግብጸ ወውእቱ ዳግመ ይቀውም በእንተ ቀትለ ንጉሠ መስዕ።

Dan. 11:9 ወይበውእ ውስተ መንግሥቱ ለንጉሠ አዜብ ወይሰወጥ ብሔሮ።

Dan. 11:10 ወደቂቁ ይጻብኡ ወያስተጋብእ አሕዛብ ወሠራዊተ ብዙኃን ይመጽእ ወይትቃተል ምስለ ንጉሠ መስዕ ወያቀውም ብዙኃን አሕዛብ ወይትአረወይ ንጉሠ አዜብ ላዕለ ንጉሠ መስዕ።

Dan. 11:11 ወያቀውም ብዙኃን አሕዛብ ወያገብኡ ውስተ እዴሁ ሰብኡ።

Dan. 11:12 ወይነሥእ ሕዘቢሁ ወያዐቢ ልቦ ወይቀትል አእላፈ ወኢይጸንዕ።

Dan. 11:13 ወይሰወጥ ንጉሠ መስዕ ወያመጽእ ሠራዊተ ብዙኃን እምዘቀዲሙ ወእምድኅረ ብዙኅ መዋዕል ይመጽእ በዐቢይ ኅይል ወበንዋይ ብዙኅ።

Dan. 11:14 ወበእማንቱ መዋዕል ብዙኃን ይትነሥኡ ብዙኃን ላዕለ ንጉሠ አዜብ ወደቂቁ ዐመፃ ሕዝብከ ይትነሥኡ ለአቅሞ ራእይ ወይደክሙ።

Dan. 11:15 ወይመጽእ ንጉሠ መስዕ ወይክዑ ኅይለ ወይእኅዝ አህጉራተ ጽውናተ ወመዝራዕተ አዜብ ኢይቀውም ወለሕዝብ እምኅሩያኒሁ ወአልቦ ኅይል ለቀዊም።

Dan. 11:16 ወይገብር ዘመጽአ ኅቤሁ በከመ ሥምረቱ ወአልቦ ዘይቀውም ቅድሜሁ ወይቀውም በምድር ሠናይት ወይፌጽም በእዴሁ።

Dan. 11:17 ወይሬሲ ገጽ ለመጺእ ውስተ ኅይለ ኩሉ መንግሥቱ ወመላእክት ምስሌሁ ወይገብር ወወለተ አንስትያ ትትወሀብ ሎቱ ለጠፊኦቱ ወኢትነብር ወኢትከውኖ ብእሲተ።

Dan. 11:18 ወእምዝ ይመይጥ ገጽ ውስተ ደሰያት ወይእኅዝ ብዙኃን ወይስዕር መኳንንተ ኅፍረት ሎቱ ወዘእንበለ ኅፍረት ይትመየጥ።

Dan. 11:19 ወይመይጥ ገጽ ለአጽንዖተ ምድሩ ወይደክም ወይወድቅ ወኢይትረከብ።

Dan. 11:20 ወይትነሣእ ወይነብር ዲበ መንበሩ ወይስዕር ሥልጣነ ወሠናየ መንግሥታት ወእምድኅረ ብዙኅ መዋዕል ይሰበር አኮ በመዓት ወአኮ በጸብእ።

Dan. 11:21 ወይቀውም ዲበ መንበሩ ኅሱር ወኢይሁብዎ ክብረ መንግሥት ይመጽእ በኅድአት ወይጸንዕ መንግሥቱ በሁከት ወይትነሥኡ ላዕለ ንጉሠ አዜብ በኅይል ወይትቃተሎ ለንጉሠ አዜብ።

Dan. 11:22 ወመዛርዕተ እለ ይጸብእዎ እምቅድሜሁ ይትቀጠቀጡ መጋብያነ ሕግሂ።

Dan. 11:23 ወእምእለ ይሳተፍዎ ይገብሩ ላዕሌሁ ጽልሑተ የዐርግ ወይጸንዕ በሕዝብ ንኡስ።

Dan. 11:24 ወብሔር ጥሉል ይመጽእ ወይገብር ዘኢገብሩ አበዊሁ ወአበወ አበዊሁ ወይማሀርክ ወይዪውው ወይነድእ እንስሳሆሙ ወላዕለ ጸወናቲሆሙ ይኄሊ ኅሊና እኩየ እስከ ዕድሜሁ።

Dan. 11:25 ወይነሥእ ኅይሎ ወልቡ ላዕለ ንጉሠ አዜብ በሠራዊት ዐቢይ ወንጉሠ አዜብ ይጸንዕ ለተጻብኦ በሠራዊት ዐቢይ ወጽኑዕ ጥቀ ወኢይጸንዕ።

Dan. 11:26 እስመ ይኄልዩ ኅሊና እለ ይበልዑ እምውስተ ማእዱ ይቀጠቅጥዎ ኅይሎ ወይወድቁ ብዙኃን ቅቱላን።

Dan. 11:27 ወክልኤሆሙ ነገሥት ያአክዩ ልቦሙ ወበአሐቲ ማእድ ይትናገሩ ሐሰተ ወኢያረትዑ እስመ ዓዲ ኢበጽሐ ዕድሜሁ።

Dan. 11:28 ወየአቱ ብሔሮ ምስለ ብዙኅ ንዋይ ወልቡሰ ላዕለ ሥርዐት ቅድስት ወይገብር ወይትመየጥ ኅበ ምድሩ።

Dan. 11:29 ለበዕድሜሁ ይትመየጥ ወይመጽእ ውስተ አዜብ ወኢይከውኖ በቅድሜሁ ወበደጋሪቱ።

Dan. 11:30 ወይመጽኡ ኅቤሁ ጺም ወከይተም ወኔባዕ ወይትየመጥ ወይትዐዕ ላዕለ ሥርዐት ቅድስት ይትመየጥ ወይገብር ወያረኹሱ መቅደስ በኅይል ወይበረብር ወያነብሩ ጣዖተ ዲበ እለ የኅድጉ ሥርዐተ ቅዱስ።

Dan. 11:31 ወዘርዖሙ እምኔሁ ይትነሥኡ ወያረኹሱ መቅደስ ኅይል ወያትሕቱ መሥዋዕተ ዘዘልፍ ወያነብሩ ጣዖተ በዘያማስኑ።

Dan. 11:32 ወእለሂ ይዔምፁ ሥርዐተ ያመጽኡ ዳኅፀ ለሕዝብ ወእለሂ የአምሩ አምላኮ ይጸንዑ ወይገብሩ።

Dan. 11:33 ወጠቢባን ሕዝብ ያሌብዉ ብዙኅ ወይደክሙ በኩናት ወበእሳት ወበተዪውዎ ወይትበረበሩ ብዙኅ መዋዕለ።

Dan. 11:34 ወበደዌሆሙ ይረድእዎሙ ኅዳጠ ረድኤተ ወይትዌስኩ ብዙኃን ላዕሌሆሙ በዳኅፃቲሆሙ።

Dan. 11:35 ወይደውዩ እምጠቢባን ከመ ያርስንዎሙ ወያጽርይዎሙ ያንጽሕዎሙ እስከ ጊዜሁ እስመ ዓዲ ኢበጽሐ ዕድሜሁ ወዘይቀውም ውስተ መካን ቅዱስ ወዘያነብብ መጽሐፈ ዳንኤል ለይለቡ።

Dan. 11:36 ወይከብር ንጉሥ በከመ ፈቀደ ወይትዔበይ ወይዜኅር ላዕለ ኩሉ አማልክት ወላዕለ አምላክ አማልክት ይነብብ በትዕቢት ወያረትዕ እስከ የኅልቅ መዓት ወእስከ ምንዳቤ ተገብረት።

- Dan. 11:37 ወላዕለ አምላክ አበዊሁ ኢየአምር ወበፍትወተ አንስት ወላዕለ ኩሉ አምላክ ኢየአምር እስመ ላዕለ ኩሉ ይትጫበይ።
- Dan. 11:38 ወለእግዚአብሔር አዚዝ ዲበ መንበሩ ይዜኅር ወለእግዚአብሔር ዘኢየአምርዎ አበዊሁ ያኩብር በወርቅ ወበብሩር ወበዕንቁላ ሠናይ።
- Dan. 11:39 ወይገብር በበ አህጉር ጽኑዓት ምስለ አምላክ ነኪር ዘየአምር ክብረ ወሥልጣነ ላዕለ ብዙኃን ወይከፍል ምድረ በሜጥ።
- Dan. 11:40 ወበጊዜ ዕድሜ ይጸብኦ ለንጉሠ አዜብ ወይትህወክ ላዕሌሁ ንጉሠ መስዕ በአፍራስ ወበሠረገላት ወበአሕማር በብዙኃት ወይበውእ ውስተ አምዳሮት።
- Dan. 11:41 ወይትመየጥ ወይበውእ ውስተ ምድር ሠናይት ወብዙኃን ይደክሙ ወእሙንቱ ይድኅኑ እምእዴሁ ኤዶም ወሞአብ ወደቂቀ አሞን።
- Dan. 11:42 ወይፌኑ እዴሁ ውስተ አምዳሮት ወምድረ ግብጽ ኢትድኅን እምእዴሁ።
- Dan. 11:43 ወይሜለጥ ላዕለ ብዙኅ መዛግብት ዘወርቅ ወዘብሩር ወላዕለ ኩሉ ፍትወተ ግብጽ ወኖባ ወኢትዮጵያ ይከውንዎ ሎቱ ረዳእያነ።
- Dan. 11:44 ወዜና ይበጽሖ ወይጌጉእ እምሥራቅ ወእምስሜን ወይወፅእ በመዓት ዐቢይ ይቀትል ወያጠፍእ ብዙኃን ሰብኦ።
- Dan. 11:45 ወይተክል ደብተራሁ ውስተ መካን ሠናይ ማእከለ ባሕር ወመቅደስ ሠናይ ወደብር ዐቢይ ወይጸንዕ እስከ ጊዜሁ ወአልቦ ሎቱ ረዳኢ።
- Dan. 12:1 ወውእተ አሚረ ይትነሣእ ሚካኤል መልአክ ዐቢይ ዘይቀውም ለደቂቀ ሕዝብከ ወይከውን ሕማም ዐቢይ እምኔሁ ወምንዳቤ ዘኢኮነ ከማሁ እምእመ ተፈጥሩ አሕዛብ ዲበ ምድር እስከ ውእቱ ጊዜ ወይድኅኑ በውእቱ መዋዕል ሕዝብከ ኩሉ ዘተረክበ ውስተ መጽሐፈ ሕይወት።
- Dan. 12:2 ወብዙኃን እለ ይነውሙ ውስተ መሬተ ምድር ይትነሥኡ ለሕይወት ዘለዓለም ወእልክቱሰ ለኅሳር ወለኅፍረት ዘለዓለም።
- Dan. 12:3 ወእለ ለበዉ ይበርሁ ከመ ብርሃነ ሰማይ ወእምነ ጻድቃን ብዙኃን ከመ ከዋክብተ ሰማይ እስከ ለዓለም።
- Dan. 12:4 ወዓዲ ወአንተሂ ዳንኤል ዕጽዎ ለዝ ነገር ወኅትሞ በማኅተም ወጽሐፎ እስከ ማኅለቅተ ዓለም ወእስከ ይትሜሁሩ ብዙኃን ወትበዝኅ ጥበብ።
- Dan. 12:5 በሣልስት ዓመተ መንግሥቱ ለቂሮስ ንጉሠ ፋርስ ነጻርኩ ኣነ ዳንኤል ወርኢኩ ካልኣነ ክልኤተ ዘይቀውሙ አሐዱ እምለፌ ድንጋገ ፈለግ ወአሐዱ እምከሐ ፈለግ።
- Dan. 12:6 ወይቤሎ ለብእሲ ዘይለብስ ጠብደነ ዘህሎ መልዕልተ ማየ ፈለግ እስከ ማእዜኑ ማኅለቅቱ ለዘትቤ ትእምርት።
- Dan. 12:7 ወሰማዕክዎ ለብእሲ ዘይለብስ ጠብደነ ዘህሎ ዲበ ማየ ፈለግ ወአልዐለ የማኖ ወጸጋሞ ውስተ ሰማይ ወመሐለ በዘሕያው ለዓለም ከመ በጊዜሁ ወበከመ ዕድሜሁ ወመንፈቀ ዓመት ሶበ ተፈጸመ ዝርወቶሙ ለሕዝብ ቅዱሳን ይትፈጸም ዝንቱ ኩሉ።
- Dan. 12:8 ወአነሂ ሰማዕኩ ወጠየቄ ወእቤ እግዚኦ ምንት ድኃሪቱ ለዘትቤ ትእምርት።
- Dan. 12:9 ወይእዜኒ ዓዲ ሑር እስመ ዕጽው ወኅቱም ነገሩ እስከ ማኅለቅተ ዕድሜሁ።
- Dan. 12:10 ይጻርዩ ወይጸዕድው ወይቤልዎሙ ወያረስንዎሙ ወይትቂደሱ ብዙኃን ወይስሕቱ ጊጉያን ወኢይሉብዉ ዐማፅያን ወይጤይቄ ጠቢባን ወጠቢባን ሕዝብ ይሉብዉ ብዙኅ ጊዜ ሣህሉ እምዘወሀብክዎሙ።
- Dan. 12:11 ወእምጊዜ ሣህሉ ይሰዐር መሥዋዕት ለውሂበ ርኩስ ሙሉን መዋዕል ዐሠርቱ ወክልኤቱ ምእት ወተስዓ።
- Dan. 12:12 ብፁዕ ዘተዐገሠ ወበጽሐ ዐሠርቱ ወሠለስቱ ምእት ወሠላሳ ወኅምስቱ መዋዕል።
- Dan. 12:13 ወአንተስ ዳንኤል ሑር ለዕድሜ ወአዕርፍ እስመ ዓዲ በ መዋዕል ወሰንበታተ በዘትትፌጸም ማኅለቅቱ ወትትነሣእ ውስተ ርስትክ በደኃሪ መዋዕል።